

無量壽經義疏

吉藏撰



序	8
佛說無量壽經	9
A01 序分	10
B01 遺教序	10
C01 明如聞而傳	10
C02 明親聞	10
C03 明聞無前後	10
C04 明住處	10
C05 同聞眾	11
D01 聲聞同聞眾	11
E01 眾類	11
E02 唱數	11
E03 嘆德	11
E04 列名總結	11
D02 菩薩同聞眾	13
E01 唱眾類	13
E02 列名	13
E03 歎德	14
F01 略嘆	14
G01 安住	14
G02 嘆外化	14
G03 嘆自行	14
F02 廣嘆	14
G01 舉八相成道	14
H01 處天宮	15
H02 處胎	15
H03 現生	15
H04 出家	15
I01 出家因緣	16
I02 學道	16

H05 降魔	16
H06 成道	17
H07 轉法輪	17
I01 釋梵為請主	17
I02 明佛受請	17
I03 明說法	17
H08 雙林示滅	19
G02 遊十方	19
H01 總舉遊化之德	19
I01 法	19
I02 譬	19
I03 合	19
H02 別舉三地德為嘆	19
I01 八地德	19
I02 九地德	20
I03 十地德	21
D03 廣嘆自行	22
D04 總結	22
B02 發起序	22
C01 如來現相	22
C02 阿難問	23
D01 所觀相	23
D02 正發問	23
C03 檢問阿難意	23
C04 阿難奉答	23
C05 正答所疑	23
D01 委問	23
D02 正答所疑	24
A02 正說分	24
B01 法藏修因 感淨土果	24
C01 廣說因	24
D01 明修因之緣	24

D02	正辨因	25
E01	修因之人	25
E02	修因行	26
F01	詣佛致敬	26
F02	略辨因偈	26
F03	明發願	26
F04	請佛為證	27
F05	請十方佛為證	27
E02	廣修因	27
F01	法藏請出修因方法	27
F02	明彼佛推其自解	28
F03	明法藏重請	28
F04	明彼佛為說方法	28
G01	明修行必剋	28
G02	廣說	28
F05	重明法藏依教修行	28
G01	明依教修行意	28
H01	正明修行	28
H02	明答粗疑	29
G02	明佛問出行法	29
E03	廣陳四十八願	29
F01	正說願	29
G01	願得淨土	29
G02	願得眷屬	31
G03	願得法身	32
F02	明說誓要願	32
G01	正誓	32
G02	誓後更願	32
G03	說誓要瑞	32
F03	感瑞證成	32
E04	明今釋迦說法藏順願之行	32
F01	牒誓願	33

F02	明修行之事	33
C02	明得淨土妙果	34
D01	略辨得果	34
E01	明法身	34
E02	明淨土	34
D02	廣明得果	34
E01	明佛果	34
F01	明光明果	35
F02	明其壽長遠	35
G01	明彼佛壽	35
G02	明聲聞天人壽命長遠	35
F03	明眾數難量	36
G01	總明眾數多少 略嘆眾德	36
G02	的辨三會數	36
H01	法說	36
H02	譬	36
H03	合	36
E02	明淨土果	36
F01	明國土莊嚴	36
G01	明寶樹莊嚴	36
H01	明諸樹	36
H02	明伎樂	38
H03	明講堂樓觀莊嚴	38
H04	明有好寶池莊嚴	38
I01	明池縱廣	38
I02	明有妙好水	38
I03	明有好花	39
I04	明池水功用	39
F02	明人物美妙	39
B02	勸物修因 往生彼土	41
C01	示修因方法	41
D01	略明生因	41

D02	廣明三輩	41
C02	勸物修因往生	42
D01	舉彼出勝妙伎樂以引物	42
E01	明勝妙快樂	42
F01	明十方諸佛讚嘆供養彼佛	43
G01	明十方菩薩往觀	43
H01	明身業供養	43
H02	明口業供養	43
H03	明意業供養	43
G02	明彼佛為往菩薩授記	43
H01	明授記之相	43
H02	正明授記	44
G03	明十方諸佛 各命其土菩薩 令往安養國 供養聽法...	44
G04	明經教難聞 教物生信	44
H01	正嘆聞經	44
H02	舉所證理	44
H03	舉諸難以教物生信	44
F02	明釋迦讚美彼土勝妙快樂	45
G01	明彼土人天眷屬勝妙	45
H01	明諸菩薩人天觀音大勢至等智德勝...	45
H02	遍明彼土人物神通供養稱意自在之德...	45
G02	明彼佛為眾說法之眾盛事	45
H01	明佛說	45
H02	明菩薩說	46
I01	明說無乖違	46
I02	嘆德	46
E02	引物修因 急往生也	49
F01	牒別人淨	49
F02	牒土淨	49
D02	明娑婆雜惡可棄	50
E01	貶毀	50
E02	勸物修出離善	52

F01	舉善勸之	52
F02	領解	53
F03	勸生齊信心	53
F04	擊起時情執 彌勒同修	53
G01	勸自願勤修	53
G02	明順教舉旨	54
E03	明善惡相形	54
F01	將欲明惡	54
F02	正明五惡	54
G01	總明	55
G02	別明	55
H01	先明惡因	55
H02	明三報苦果	55
H03	總舉三毒之過	60
I01	勅離過修善	60
I02	舉善勸修	61
D03	西方之相勸物信	62
E01	現西方土使人欣慕	62
F01	明如來告侍者令請	62
F02	侍者起整服致請	62
F03	明放光現土	62
F04	佛審為見	62
F05	明問除疑惑	63
G01	問胎生化生	63
G02	答胎生	63
G03	答化生	63
G04	同勸生	63
G05	結其得失	63
G06	作譬顯勝劣	64
E02	問往生多少	64
A03	流通分	65
B01	歎經深遠 廣彰利益 勸其受持	65

B02 廣彰此經難值 65

B03 舉眾難 欲彰此法難聞 勸生敬仰 受持不忘..... 65

B04 時坐悟道得利 66

序

夫，真極恬然，以虛寂為宗。
凝神萬境，不慮而照；澄淨淵泊，不形而應。然感機不同，化不一揆故。
形有巨細，壽有修短，教有精粗，土有淨穢。隆益萬殊，證悟非一。
西方安養，淨土人純，殖國曠劫，感聖亦長。
阿彌陀世尊，乘本誓願，應形淨刹託壽。
使五濁眾生，清虛勝業；令三輩行人，殖遐年之善。十念願成，命終則往，
九輩行立，報謝便至；
談彼國土，七寶宮殿，金池玉樹，互相映發；衣食自然，飯饌百味。
說人，則唯賢與聖，共相勳修。身色紫金，自然化生。
稟受虛無之身、無極之體。栖心真境，常宣大乘。辨明法相，快樂無極。

南無本師釋迦牟尼佛

自歸於佛 當願眾生 紹隆佛種 發無上意
自歸於法 當願眾生 深入經藏 智慧如海
自歸於僧 當願眾生 統理大眾 一切無礙

佛說無量壽經

題云佛說者，釋迦乃是此方統王之主，讚揚彼佛長遠因果，微妙快樂，故云佛說也。

無量壽者，若存胡本，號曰阿彌陀，此云無量壽。壽既長遠，彌綸曠劫。劫數既遠，時算莫測，故云無量也。壽者，色心相續不斷為義。通明壽之與命，體一而異名。但命據始終，壽論其期。故舉壽名，示彼有保終之命也。

經者，明前佛後佛，道覺雖殊，詮理之言不可改異。辨教意矣。

夫，論如來說法，不過二種：①次第，②偏方。

今此典者，非次第教。何以知然？如釋迦一化，辨佛壽有四時：

①唱八十。②《大品》、《思益》等，說有七百僧祇之壽，③《法花》，辨壽命無量，④《涅槃》盛明常住。

今解阿彌陀佛，明昔法藏修因，生於西方，無量壽命中，得成佛果。由是報因成佛，一身證果。若推此為言，只須以此土釋迦八十年佛相准。何以知之？如太子生於王宮，於八十年中備得佛果，唯壽八十，類如無量壽命中，備得種智亦稱無量壽佛。此二佛既一種無異，而經應與第一時同，則是初教。今所以解言非次第教者，此經已談一乘之因，盛說菩提之業，故知非初教。是故，當知是偏方別教也。

然，既稱壽與《法花》同，而非《法花》教攝者，《法花》是次第教。此教非次第，破執而興，故非《法花》教攝。

然解《法花》佛壽有三家異：

①云亦是報因佛，如前教。

②云是神通力，延一念壽命令無量劫。經明五百由旬之外，方明佛果，既在變易之生，成佛常滿。則應入滅而延之住世，為無量之壽。

③云是覆相。明常說為無量，就有為報中，當有此命。但時機未宜灼然辨常所以，依惴望說耳。

大判經例，則有三段：謂序、正、流通。

序為正宗弄引，正為辨經旨歸，流通為明付囑後世，修行無壅。

8

從如是，訖樂聞，序說文也。
自佛告下，訖略言之耳，正說文也。
從其有得聞彼佛名號經，流通文也。
正說亦兩段：①明法藏修因，感淨土果。②明勸物修因，往生彼土。
此教之興，本欲令五濁眾生，捨穢取淨，却短修長，故先示妙果，後方廣勸修之。
流通亦二：①舉經有深益，用付囑流通。②明時眾歡喜奉行。
從得聞彼佛名者下，訖芬芬而降初文。從佛說下，後明奉行方也。

A01 序分

就序有二：①遺教序；②發起序。
遺教序，正為證阿難傳佛語無謬，是證阿難經。
發起序，為證如來說經，有其由序，逗物無謬，是證如來說經所以也。
從初，訖一時來會，是遺教文。
從諸根悅豫下，訖序是現聞，發起序文也。
兩序，各為五意。

16

B01 遺教序

我聞如是：一時，佛住王舍城耆闍崛山中。
遺教序五者：

C01 明如聞而傳

如是。
明其如聞而傳，無有差謬，但導如足。
更加是者，欲顯如聞所傳，即是佛語，實可信。

C02 明親聞

我聞。
但恐此我濫餘人，故本起之初自稱。阿難曰：我聞如是也。

C03 明聞無前後

一時。
佛口密，皆使侍者有所不聞經，悉重為說，皆令親聞。
傳者，又得佛覺三昧，頓領胸襟，皆無漏失。
故云一時。

C04 明住處

有二句，自廣至狹。

32

8

又，釋佛別取為一證，以舉宗師為證，令必順此教。
又，舉佛本欲取佛住處，非欲顯佛為師之意。
佛住王舍城。

且依一解。古昔有一國王名為普明，在餘城中治化。有一尼乾與比丘爭競，詣王判決。時，王曲就人情，尼乾得理。比丘不合，則呼天扣地，其夜宮城陷沒，唯除太子東宮不沒。國人還，復舉太子，正以見父王無道，不肯就位。則共世二大臣詣山隱學。一宿之中，天神感之，為王造城郭舍宅。國人則號為王舍城。自是以來，於中立國，相續至今。

國名摩伽陀，城名王舍城。
耆闍山。

此明的處，此稱鷲頭山，或加靈者，仙靈遊巖，上似鷲頭。山下有寺六十岩嶠。佛在此處，故明其名。

C05 同聞眾

眾有二：①聲聞，②菩薩。

D01 聲聞同聞眾

與大比丘眾，萬二千人俱。

比丘常隨佛後。但佛說法處，其有比丘在中。菩薩方詣，助佛揚化。故先小後大。

比丘眾有四段：①眾類，②唱數，③略嘆，④列名總結。

E01 眾類

與之，言共。
大，有三義：①生大解，②破大惡，③證大果。
比丘，三義如常聞。

E02 唱數

數，有萬二千人。

E03 嘆德

一切大聖，神通已達。
德乃無量，今但舉要。聖之言通上諸人，皆是聖果。遊心空理，隱顯難測，故稱聖人。神通已達，達之言證，證六通三明等是也。

E04 列名總結

其名曰：尊者了本際、尊者正願、尊者正語、尊者大號、尊者仁賢、尊者離垢、尊者名聞、尊者善實、尊者具足、尊者牛王、尊者優樓頻伽葉、尊者伽

8

16

24

32

耶迦葉、尊者那提迦葉、尊者摩訶迦葉、尊者舍利弗、尊者大目犍連、尊者劫賓那、尊者大住、尊者大淨志、尊者摩訶周那、尊者滿願子、尊者離障閼、尊者流灌、尊者堅伏、尊者面王、尊者果乘、尊者仁性、尊者喜樂、尊者善來、尊者羅云、尊者阿難，皆如斯等上首者也。

其名曰，列名。

此皆稱尊者。尊者，是御人之號。舉德標人，故稱尊者。

了本際，了之言識，本際是空，從所識標名，亦稱阿若憍陳如。此言無智，陳如是姓。於初轉法輪，最初悟道。所以然者，迦葉佛遺法住世，同伴九人，方覺無常，共求出家，入山學道。四人根利則悟，五人根鈍不悟。便共誓願，吾於釋迦佛法中，要先悟道。以此誓故，共佛俱生。佛既出家，父王遣國中貴族同伴五人隨侍太子入山。不肯入山，隱在鹿苑。佛初成道，則為說法。由是最初得道也。五人者：①陳如，②阿葉鞞，③摩訶男，④波提，⑤波敷。此但出陳如一人。

正願者，本期出家得道，故名正願。

正語，口無四過。

大號，美名遐布。

仁賢，德性軟和，故彰其名。

離垢，離破戒之垢。

名聞，多人所知，或是迦延，解義名聞大佳。

善實，從內德彰名。

具足，從受戒表名。

牛王，從昔因緣，五百世中為牛，兩處似牛，故從此為名。人見哄笑，佛以神力，接置星宿天上，時來聽法也。

優樓頻螺此三人，從處標名。優樓頻螺，從木瓜得名；伽耶，城名；那提，水。迦葉是姓，或翻為龜如。

舍利弗，此名身子。舍利弗外祖善相，見舍利弗父作國大相，妻女與之，孕舍利弗，共弟拘絺羅論義。母勝於弟，弟竊思惟：我姊未孕時不如我，今屢勝我，必懷聰明之子。我當入山學讀，外甥長大共論。則入山讀十二違陀，無暇不揃爪故，呼其號名長爪梵志。後生身子，始年八歲，騁十六大國論議無類，則外道法中出家為沙門。然，外道弟子沙門，咸以徒眾付身子、目連二人，使教化成就。二人則共要言，得道之日，誓無前後。身子欲向舍衛城，阿說祇比丘亦欲向城。佛誠說祇：汝朝入城，當見非常之人，略為說法。舍利弗見說祇

威儀詳序，則前問言：汝師是誰。答言：吾師天中天，三界無極尊，相好身丈六，神通遊虛空，不會天世位，乃至心淨開法門。身子卓然毛豎。汝有好師，應有好法，當為我說。祇說自謙：我年既幼稚，學日又初淺，豈能宣如來，至真廣大義。身子慙慙，復問：何名沙門？答曰：一切諸法本，因緣空無主，息心達本原，故號為沙門。聞此一偈，則得須陀洹果。還至本處，目連見狀貌怡悅，即便語言：我本與卿共要：得道誓無前後。卿何故在前，而不語我耶？身子答曰：時流迅疾，無暇遊返。即便為說上偈。目連聞之，即得初果。二人相將，至佛所，俱證無學果也。

目連亦是姓，字拘律陀，其父為相國，有大威勢，富貴而無嗣。有樹名拘律陀，往彼求子，日日祈求祭祀結願，了無髣髴證。後便與樹立要，若更滿七日無子，便當斬滅。樹神憂惱，四出推求，無應生者。上白帝釋，具說上事，苦求救護。帝釋觀之，唯見親友一天，命應垂終。帝釋語言：汝可生彼。天答而言：人間苦極，我不契也。釋復語言：釋迦如來當生人間，汝可因斯得道。彼天命終，則便往生婆羅門家。以從拘律陀樹求得此兒也，靜志從內定得名。

周那，言離香。

滿願，是富樓那。此是大菩薩，赤色為相。

離障那律，修得天眼，徹見障外，故從為名。

羅云，是羅睺羅，此云覆障，六年在胎也。

阿難，此言無染。

皆如斯等，此是總結名也。

D02 菩薩同聞眾

自有四段：①唱眾類，②列名，③歎德，④總結來會也。

E01 唱眾類

又，與大乘眾菩薩俱：普賢菩薩、妙德菩薩、慈氏菩薩等，此賢劫中一切菩薩。

大士，名道心。自行兼他，位懷廣博，故名道心。

E02 列名

又，賢護等十六正士：善思議菩薩、信慧菩薩、空無菩薩、神通花菩薩、光英菩薩、慧上菩薩、智幢菩薩、寂根菩薩、願慧菩薩、香象菩薩、寶英菩薩、中住菩薩、制行菩薩、解脫菩薩。

善思議者，內德深達，善會真宗。

信慧，從內信立名。

空無者，秤如之背。
神通花者，分身滿十方，一念普至。
乃至解脫者，受報眾生結縛，自亦脫也。

E03 歎德

從皆遵以下歎德段。大分為二。
①從初，訖究竟彼岸以來，略嘆。
②從於無量世界以下，訖皆度彼岸以來，廣嘆德也。

F01 略嘆

略嘆有三：①安住，②嘆外化，③嘆自行。

G01 安住

皆遵普賢大士之德，具諸菩薩無量行願，安住一切功德之法。
嘆齊普賢，入法界行也。備十地無量行願故，云具行願。證理窮心無二，故稱安住。
遐劫積修，為己之勳，故云功。以此被外，沾洽一切，故稱為德。

G02 嘆外化

遊步十方，行權方便。
乘通遊機，故云遊步。善巧度物，故云行權。此二句嘆外化也。

G03 嘆自行

入佛法藏，究竟彼岸。
入佛法藏，入之言解。名理為藏，解契宗原，故云入藏。入佛法藏，究竟彼岸，此二句嘆自行也。

F02 廣嘆

廣嘆中有二。
①從初，訖微妙難量以來，別舉八相成道，為嘆。
②從遊諸佛國已下，訖皆度彼岸，明遊十方。

G01 舉八相成道

於無量世界，現成等覺。
稱機應物，舉此為嘆。就八相嘆中，將欲舉故先出。示八相之處，則是無量世界。
於此世界示八相成道，故云成等正覺。八相：①處天宮，②入胎，③現生，④出家，⑤降魔，⑥成道，⑦轉法輪，⑧入滅處。

H01 處天宮

處兜率天，弘宣正法。
兜率天，此云勝妙天。多聰明，不放逸，示如來為人天之師故。
將下生人中，先處此天，為說不退轉之行。

H02 處胎

捨彼天宮，降神母胎。
所以不直化生者：①為外眷屬，令護佛法故。②遺舍利，廣起佛事故。

H03 現生

從右脅生，現行七步。
示異凡穢，故從右脇生。右是方便，欲明先權後實也。
現行七步，明過六道。
光明顯曜，普照十方無量佛土。
生時放光，皆使知佛生也。
六種震動。
明生時動地。六種動者：①動，②涌，③起，④震，⑤吼，⑥覺也。
舉聲自稱：「吾當於世為無上尊。」
明唱道高。
釋梵奉侍，天人歸仰。
明標示人天歸敬。
示現算計、文、藝、射、御。
明修學世伎。六藝者，算計是一。文藝、詩書，及禮、樂、射御是六也。能御車上於六目之上。
博綜道術。
博之言廣，綜之言習。廣習五明道術。
貫練群籍。
含於內論。貫言通，練言明也。
遊於後園，講武試藝。
明學伎已，於後苑講試之耳。講之言習，試之言用也。
現處宮中。
示處深宮。

H04 出家

有二：①出家因緣，②學道。

I01 出家因緣

色味之間，見老病死，悟世非常。棄國財位，入山學道。
明出家之緣。緣見四非常，故云見老病死，悟世非常。
服乘白馬，寶冠瓔珞，遣之令還。捨珍妙衣，而著法服，剃除鬚髮。
明捨世飾好，而著法服，正明出家。則是就獵師覓鹿皮衣，天神奉剃髮出家也。

I02 學道

有二：①示同邪道，②歸從正法。

J01 示同邪道

端坐樹下，勤苦六年。
示同邪道，故云勤苦六年。
行如所應。
行是因，所應是果。果應因行，故云所應。
現五濁剎，隨順群生。
明先同修四禪八定，五濁土中之法也。

J02 歸從正法

示有塵垢，沐浴金流。
既因六年苦行無所得，形清體縮，故入金池洗之也。
又以表理，明必以定慧之水，斷除結使也。
天按樹枝，得攀出池。
為示體弱，故須攀枝，又表接物機也。
靈禽翼從，往詣道場。
得道之所，五百青雀從佛至道樹。表德被禽鳥，無不師化者也。
天祥感徵，表章功祚。
明德被人天。天祥感現，明此諸天童子感動，顯菩薩必成道，故云感。
哀受施草，敷佛樹下，跏趺而坐。
表物獻微情，乃至草薄之物，無不哀受，故受草敷之而坐也。

H05 降魔

奮大光明，使魔知之。
明將欲降伏，故悟之以光明也。
魔率宮屬，而來逼試。
明魔令其眷屬，而逼以眾難，試菩薩道。

8

制以智力，皆令降伏。
正伏之以智，令歸伏也。

H06 成道

得微妙法，成最正覺。

H07 轉法輪

此中有三：①釋梵為請主，②明佛受請，③明說法。

I01 釋梵為請主

釋梵祈勸，請轉法輪。

故《涅槃經》中云：汝雖生人道，已超第六天，明同梵王請，能請佛成道。
三七日思惟所得道妙，欲令一切普得。二七思惟眾生根鈍，不肯領受，則明無機。
三七思惟欲說，爾時則梵王為請之時也。
祈，明求。勸，為慊貌之辭。轉，如常解。

I02 明佛受請

以佛遊步、佛吼而吼。

佛示同佛十力四無畏之說，故云佛吼而吼，舉獅子王哮吼為譬耳。

16

I03 明說法

有二：①明喻，②明法說。

J01 明喻

扣法鼓、吹法螺、執法劍、建法幢、震法雷、曜法電、澍法雨。
扣鼓，誡兵。內合佛說法以集眾，欲進趣於善。
外譬吹螺，是改號之相。內合佛說法，改惡為善。
劍，有斬斫之用。內合佛說法，以生物解，有斷結之用也。
建幢，是戰勝之相。譬說法降魔得勝也。
震雷，能駭動物情。譬說法，皆動無明之識也。
耀電，譬說法，有照了之用。
雨，有潤澤之功。譬說法，能治利眾生也。

24

J02 明法說

有二：①正廣說法利益。②舉三業益物之相，結成前利益也。

K01 廣說法利益

演法施，常以法音覺諸世間。
演，言廣，廣說四諦十二因緣等教，宣布有緣也。
光明普照無量佛土。

32

明法將宣放，光感悟於物。或是將說般若，放光動地也。以智光攝魔闇，故云光明普照。

一切世界，六種震動，總攝魔界、動魔宮殿，眾魔懾怖，莫不歸伏。

以神通動魔宮，使眾惡緣改慘歸伏，故云懾怖也。

擗裂邪網，消滅諸見，散諸塵勞。

說法破之，故云擗也。網譬邪智，魔以邪智裹結眾生，故以正智慧力破裂之耳。

壞諸欲塹，

滅五鈍等惡。

嚴護法城，

涅槃妙果，是安身處，故稱為城。說法令眾生修戒定慧，以莊嚴之也。

開闡法門。

開說涅槃城門，令眾生進趣其果也。

洗濯垢污。

執相之惑，皆沾污慧身，使習忘解，遣除迷垢，故云洗濯也。

自此文來，是法華前教也。

顯明清白，

無相之解，是無漏明，故云清白。

光融佛法，

光之言廣，融之言會。明法華教，會三乘萬善同歸一佛，故化廣會佛法也。

宣流正化。

示汝等所行是菩薩道，其善無偏，故云正化。

K02 舉三業益物之相

有三：①歎身業，②歎口業，③歎意業。

L01 歎身業

入國分衛，

明能分身護物機，故云分衛。

獲諸豐膳。

為物作福田，使眾生未來獲豐富之膳，故云獲諸豐膳。

貯功德、示福田。

貯之言積。智斷既具，示為福田，積殖功德之所也。

L02 歎口業

欲宣法，現欣笑，
表說法必契之相，故云欣笑。
以諸法藥，救療三苦。
法皆療物之疾，故云藥。除遣三有之苦，故云三苦也。

L03 歎意業

顯現道意無量功德，授菩薩記成等正覺。
明以前二事，顯菩薩之道意，欲使一切齊成佛果，故云受菩薩記。

H08 雙林示滅

示現滅度，拯濟無極，消除諸漏，殖眾德本，具足功德微妙難量。
明以滅迹方便，令物生善滅惡，故云消除諸漏，殖眾德本也。乃至如上等法皆難量也。

G02 遊十方

有二段。①總舉遊化之德也。②從菩薩經典下，別廣嘆三地德也。

H01 總舉遊化之德

有法、譬、合。

I01 法

遊諸佛國，普現道教。其所修行，清淨無穢。

I02 譬

譬如幻師，現眾異像，為男為女，無所不變。本學明了，在意所為。

I03 合

此諸菩薩亦復如是。

合幻師喻。

學一切法，貫綜縷練。

合本學明了句。綜之言習，縷之言悉。

所住安諦，靡不感化，無數佛土皆悉普現，未曾慢恣、愍傷眾生。

如是之法，一切具足。

合上為男為女，無所不變也。

慢之言惱，恣之言會。明見淨不貪，觀穢不惱也。

H02 別舉三地德為嘆

則為三段：①八地德，②九地德，③十地德。

I01 八地德

文有三：①明自行外化德，②明值勝緣，③明同佛化導。

J01 明自行外化德

菩薩經典，究暢要妙。名稱普至，導御十方。
自行，即通經要妙。化物，導御十方。物所廣識，而皆顯名也。

J02 明值勝緣

無量諸佛咸共護念。
為諸佛所護。在法流中，念念見多佛，見緣則勝。無一時不見佛，故知是八地。

J03 明同佛化導

佛所住者，皆已得住。大聖所立，而皆已立。如來導化，各能宣布。

I02 九地德

文有三：①嘆自行外化德，②明以神通接物，③示二乘之道。

J01 嘆自行外化德

為諸菩薩而作大師。以甚深禪慧，開導眾生，通諸法性。
嘆自行。
達眾生相，明了諸國，供養諸佛。
嘆外化。

J02 明以神通接物

化現其身，猶如電光，
如電光者，明神通應物之速也。
善學無畏之網，曉了幻化之法，壞裂魔網。
善學無畏之網，網之言智。明仰學佛四無畏智，壞裂魔網，破邪智也。
解諸纏縛。
解五蓋十纏等結。

J03 示二乘之道

文有二：①明本處，②明顯示。

K01 明本處

超越聲聞、緣覺之地，得空、無相、無願三昧。

K02 明顯示

善立方便，顯示三乘。於此化終，而現滅度。亦無所作、亦無所有，不起、不滅，得平等法。具足成就無量總持百千三昧，諸根智慧，廣普寂定。
雖皆示二乘，而內不共。大士平等萬德，故云具足無量總持也。

I03 十地德

文有二：①略嘆自行外化，②廣嘆自行化他。

J01 略嘆自行外化

深入菩薩法藏，得佛華嚴三昧，宣揚演說一切經典。
既窮因行，故云深入。因理皆蘊佛果，故云藏。
此三昧皆飾法身故云花嚴。演暢經典，明外說化物也。

J02 廣嘆自行化他

文有二：①自行，②化他。

K01 自行

住深定門，悉睹現在無量諸佛，一念之頃，無不周遍。

K02 化他

文有三。①以神通濟物，②明四辯化眾生，③明為眾生作不請之友。

L01 以神通濟物

濟諸劇難，諸閑不閑。
閑者，濟心中劇難人，言其伏煩惱，故云閑。不閑者，外凡之人，為煩惱所
使，故云不閑也。或云不閑是人，閑是天也。

L02 四辯化眾生

分別顯示真實之際，得諸如來辯才之智，入眾言音，開化一切。
超過世間諸所有法。
言其本處離音聲也。
心常諦住度世之道。
思惟應用也。
於一切萬物，隨意自在。
稱機無失也。

L03 為不請友

於中有三：①法，②譬，③合。

M01 法

法中，①標不請，②釋，③結。

N01 標

為諸庶類，作不請之友。

N02 釋

釋中有三意：①舉大士四弘誓，②舉受持，③舉慈悲德。

001 舉大士四弘誓

荷負群生，為之重擔。
以四弘誓荷負於物，故云重擔。

002 舉受持

受持如來甚深法藏，護佛種性，常使不絕。
只以住持佛法，欲使如來法藏不絕，佛種不斷故也。

003 舉慈悲德

興大悲、愍眾生。
明拔苦因果。
演慈辯、授法眼、杜三趣、開善門。
明與樂因果。

N03 結

以不請之法，施諸黎庶。
結也。
黎之言民，庶之言眾也。

M02 譬

如純孝之子，愛敬父母。
譬不捨眾生之心。如純孝子，逐慈悲母也。

M03 合

於諸眾生，視之若己。
合之也。

D03 廣嘆自行

一切善本，皆渡彼岸，悉獲諸佛無量功德，智慧聖明不可思議。

D04 總結

如是菩薩無量大士，不可稱計，一時來會。

B02 發起序

有五義：①如來現相，②阿難問，③佛檢其問意，④奉答，⑤正答所疑。

C01 如來現相

爾時，世尊諸根悅豫，姿色清淨，光顏巍巍。
佛開發宗，先將說淨土，勸物修取。示有欣悅之狀，故云諸根悅豫也。
姿色清淨者：姿之言美，清淨之言光顯也。巍巍，言德盛高顯也。

C02 阿難問

有二：①所觀相，②正發問。

D01 所觀相

尊者阿難承佛聖旨，即從座起，偏袒右肩，長跪合掌。
而白佛言：今日，世尊諸根悅豫，姿色清淨，光顏巍巍。如明鏡淨，影暢表裏，威容顯耀，超絕無量。未曾瞻睹殊妙如今。
影暢表裏者，表語其形，裏明心悅也。

D02 正發問

唯然，大聖！我心念言：「今日世尊住奇特之法、今日世雄住諸佛所住、今日世眼住導師之行、今日世英住最勝之道、今日天尊行如來之德。去來現佛，佛佛想念，得無今佛念諸佛耶？何故威神光光乃爾？」
住於奇特者，十力四無畏也。
栖心於諸佛法，則是住諸佛所住也。
雄者，是英族之美也。
佛道高妙，故云最勝也。
世眼，為導師之德。如來以化物為德，故云住。
如來之德，為四天中第一義天，故云天尊。
去來現在佛佛想念者，明三世諸佛皆有化眾生之念。光光相照，又，智智相照，故云想念也。
正云得無。今釋迦十方諸佛，同有為一大事因緣，故出世之事，何耶？
光光威神乃爾者，舉所疑以結問也。

C03 檢問阿難意

於是世尊告阿難曰：云何，阿難！諸天教汝來問佛耶？自以慧見問威顏乎？

C04 阿難奉答

阿難白佛：無有諸天來教我者。自以所見，問斯義耳。

C05 正答所疑

文有二：①委問，②正答所疑。

D01 委問

佛言：善哉，阿難！所問甚快。發深智慧真妙辯才，愍念眾生，問斯慧義。讚能生物解，故云汝問，多利益也。
如來以無蓋大悲，矜哀三界。所以出興於世，光闡道教，普令群萌，獲真法利。

讚合佛出世之意。無蓋悲者，佛慈悲，無所不覆蓋耳。

無量億劫，難值難見，猶靈瑞花，時時乃出。今所問者，多所饒益，開化一切諸天人民。

舉難以明，汝值佛意致問，實合利物之意也。

D02 正答所疑

阿難！當知如來正覺，其智難量。

明真智妙絕，照窮法界，非下情測度。

多所導御，慧見無礙。

明其用多端。

無能遏絕。

明其化周法界，不可窮盡。

以一餐之力，能住壽命。

明應不待資，能住壽也。

億百千劫，無數無量，復過於此。

釋物疑。明佛有此壽命，恒示五濁之命，唯八十耶？

諸根悅豫，不以毀損，姿色不變，光顏無異。

明令顯此相者，方說有無窮之壽，故顯姿色清淨。

所以者何？如來定慧，究暢無極，於一切法而得自在。

舉佛真本以釋定慧究暢無極故。能隨物情所宜，長短自在，而無礙也。

阿難！諦聽，今為汝說！

許說。

對曰：唯然，願樂欲聞。

明受旨，悌開後宗。

A02 正說分

正說有兩段：①明法藏修因，感淨土果。②明勸物修因，往生彼土。

B01 法藏修因 感淨土果

有二。①廣說因。②從為已成佛下去，明佛得果。

C01 廣說因

有二。

D01 明修因之緣

佛告阿難：乃往過去久遠無量不可思議無央數劫，

錠光如來興出於世，教化度脫無量眾生，皆令得道，乃取滅度。

次有如來，名曰光遠。

次名月光、次名栴檀香、次名善山王、次名須彌天冠、次名須彌等曜、次名月色、次名正念、次名離垢、次名無著、次名龍天、次名夜光、次名安明頂、次名不動地、次名琉璃妙華、次名琉璃金色、次名金藏、次名炎光、次名炎根、次名地種、次名月像、次名日音、次名解脫華、次名莊嚴光明、次名海覺神通、次名水光、次名大香、次名離塵垢、次名捨厭意、次名寶炎、次名妙頂、次名勇立、次名功德持慧、次名蔽日月光、次名日月琉璃光、次名無上琉璃光、次名最上首、次名菩提華、次名月明、次名日光、次名華色王、次名水月光、次名除癡冥、次名度蓋行、次名淨信、次名善宿、次名威神、次名法慧、次名鸞音、次名師子音、次名龍音、次名處世。如此諸佛，皆悉已過。

藉於此佛聞法，發菩提心，修行成佛故。須由藉明其緣，而不直舉世王，而出前五十三佛者，為存兩義：

- ①示如來皆照久遠之事。
- ②明眾人同值多佛出世。

然法藏一人，能超越而發心修行以成佛道，明得悟者，宜以局時人。

爾時，次有佛名世自在王，如來，應供，等正覺，明行足，善逝，世間解，無上士，調御丈夫，天人師，佛世尊。

D02 正辨因

有二：①修因之人，②修因行。

E01 修因之人

修因之人，則是國王。明是王從世自在王佛聞法故發心，皆為修行之人也。時有國王，聞佛說法，心懷悅豫，尋發無上正真道意。

明當時有國王，從佛聞法，啟悟其心，尋發道意。

棄國捐王，行作沙門。

明捨重位，出家志行。

號曰法藏。

明其得名，在能蘊畜佛法，故曰法藏。

高才勇哲，與世超異。

略嘆其德。稱逸群之能，故曰高才。能自勝勝他，故稱為勇。壞邪見之明，所以言哲。

E02 修因行

有二：①詣佛致敬，②略辨因偈。

F01 詣佛致敬

詣世自在王如來所，稽首佛足，右遶三匝，長跪合掌，以頌讚曰：

F02 略辨因偈

嘆佛恩德，酬前說法之恩，即兼表歸依之情。

如情勝鬘，嘆三業德，表歸依也。

七偈：①嘆身業，②嘆無等，③嘆口業，④嘆意業，⑤嘆有行德，⑥嘆無為功德，⑦嘆德用。

嘆身業：

光顏巍巍 威神無極 如是炎明 無與等者
嘆無等。

日月摩尼 珠光炎耀 皆悉隱蔽 猶如聚墨
如來容顏 超世無倫
舉譬顯勝。

結勝世。

嘆口業：

正覺大音 響流十方
明佛音聲，等覺十方。

嘆意業：

戒聞精進 三昧智慧 威德無侶 殊勝希有
嘆有行德。

深諦善念 諸佛法海 窮深盡奧 究其涯底
嘆無為功德。

無明欲怒 世尊永無 人雄師子 神德無量
嘆德用。

功勳廣大 智慧深妙 光明威相 震動大千
功勳，明其行位。智慧深妙，明其果滿。威神光明震動十方，明其用也。

F03 明發願

願我作佛 齊聖法王 過度生死 靡不解脫
為物之心，明其下化。

布施調意 戒忍精進 如是三昧 智慧為上

出其化物行體。上但明發心，今出其行，莫過六度。

言智慧為上者，明五度為行，不能出離生死，要須智慧。達解本原，方皆過出，故云最上也。

吾誓得佛 普行此願 一切恐懼 為作大安

造淨土文云：其眾奇妙者，明五通自在，悉不退轉。

假使有佛 百千億萬 無量大聖 數如恆沙

供養一切 斯等諸佛 不如求道 堅正不卻

校量功德。

譬如恆沙 諸佛世界 復不可計 無數剎土

光明悉照 遍此諸國 如是精進 威神難量

明修道勤苦，勇猛精進。

令我作佛 國土第一 其眾奇妙 道場超絕

國如泥洹 而無等雙 我當愍哀 度脫一切

發造淨土，十方殊妙，為化眾生故。

道場超絕者，亦是道樹超勝。亦可是修道速疾成佛，故云超越。

十方來生 心悅清淨 已到我國 快樂安隱

明十方聞名，發願來生，獲得勝果。願我作佛者，正出菩提心體。

F04 請佛為證

幸佛信明 是我真證 發願於彼 力精所欲

十方世尊 智慧無礙 常令此尊 知我心行

幸之言遇。遇自在王佛，今現而證。

上但一往發大誓願度眾生，行行甚難，人不信意。謂但有其言，未必堪行。

都無仰學之心，故請佛為證。除疑使物同行。

F05 請十方佛為證

假令身止 諸苦毒中 我行精進 忍終不悔

要心處苦，自行化他。誓逢苦不感，得樂不欣。乃至成佛，畢竟不退。忍終不悔，以成上行願也。

E02 廣修因

此中，有五段明義：①法藏請出修因方法，②明彼佛推其自解，③明法藏重請，④明彼佛為說方法，⑤重明法藏依教修行。

F01 法藏請出修因方法

佛告阿難：法藏比丘說此頌已，而白佛言：「唯然，世尊！我發無上正覺之

心，願佛為我廣宣經法。我當修行，攝取佛國清淨莊嚴無量妙土。令我於世，速成正覺，拔諸生死勤苦之本。」

F02 明彼佛推其自解

不肯為說，意欲顯法藏德也。
佛語阿難：時世自在王佛語法藏比丘：「如所修行莊嚴佛土，汝自當知。」

F03 明法藏重請

比丘白佛：「斯義弘深，非我境界。唯願世尊廣為敷演諸佛如來淨土之行。我聞此已，當如說修行，成滿所願。」

F04 明彼佛為說方法

就中，有二意：①明修行必剋，②廣說。

G01 明修行必剋

爾時，世自在王佛知其高明，志願深廣，即為法藏比丘而說經言：「譬如大海，一人斗量，經歷劫數，尚可窮底，得其妙寶。人有至心精進，求道不止，會當剋果，何願不得？」
舉此量海水得其寶用為譬。

G02 廣說

於是，世自在王佛即為廣說二百一十億諸佛剎土天人之善惡、國土之粗妙。應其心願，悉現與之。
善因雖有強弱之異，然所招之土，同是七寶。國土之粗妙，應現與之現。佛土不同，令隨願取之。粗之言大，妙者言美。明所現二百一十億土，皆是大美之土耳。

F05 重明法藏依教修行

自有四段。
①正明依教修行意，至佛所自陳。
②明彼佛問比丘出行法。
③明法藏更向佛說其所修四十八願。
④明今釋迦追說法藏比丘昔誓願之後頓滿之行。

G01 明依教修行意

可為二：①正明修行，②明答粗疑。

H01 正明修行

時，彼比丘聞佛所說嚴淨國土，皆悉睹見。超發無上殊勝之願。其心寂靜，志無所著，一切世間無能及者。具足五劫，思惟攝取莊嚴佛國清淨之行。

明往彼佛所自陳行之意，即初於五劫中，修行發願也。

H02 明答粗疑

阿難白佛：彼佛國土，壽量幾何？

佛言：其佛壽命四十二劫。

彼佛壽四十二劫。但於五劫，何足疑耶。

時法藏比丘攝取二百一十億諸佛妙土清淨之行。如是修已，詣彼佛所，稽首禮足，遶佛三匝，合掌而住。白言：「世尊！我已攝取莊嚴佛土清淨之行。」詣佛陳行。

G02 明佛問出行法

佛告比丘：「汝今可說，宜知是時。發起悅可一切大眾。菩薩聞已，修行此法，緣致滿足無量大願。」

E03 廣陳四十八願

比丘白佛：「唯垂聽察，如我所願，當具說之。」

就中有三重：①正說願，②明說誓要願，③感瑞證成。

F01 正說願

有三願：①願得淨土，②願得眷屬，③願得法身。

G01 願得淨土

- ①設我得佛，國有地獄、餓鬼、畜生者，不取正覺。
- ②設我得佛，國中人天，壽終之後，復更三惡道者，不取正覺。
- ③設我得佛，國中人天，不悉真金色者，不取正覺。
- ④設我得佛，國中人天，形色不同，有好醜者，不取正覺。
- ⑤設我得佛，國中人天，不悉識宿命，下至不知百千億那由他諸劫事者，不取正覺。
- ⑥設我得佛，國中人天，不得天眼，下至不見百千億那由他諸佛國者，不取正覺。
- ⑦設我得佛，國中人天，不得天耳，下至不聞百千億那由他諸佛所說，不悉受持者，不取正覺。
- ⑧設我得佛，國中人天，不得見他心智，下至不知百千億那由他諸佛國中眾生心念者，不取正覺。
- ⑨設我得佛，國中人天，不得神足，於一念頃，下至不能超過百千億那由他諸佛國者，不取正覺。
- ⑩設我得佛，國中人天，若起想念貪計身者，不取正覺。

- ⑪設我得佛，國中人天，不住定聚必至滅度者，不取正覺。
- ⑫設我得佛，光明有限量，下至不照百千億那由他諸佛國者，不取正覺。
- ⑬設我得佛，壽命能限量，下至百千億那由他劫者，不取正覺。
- ⑭設我得佛，國中聲聞，有能計量，乃至三千大千世界眾生悉成緣覺，於百千劫，悉共計校，知其數者，不取正覺。
- ⑮設我得佛，國中人天，壽命無能限量，除其本願，修短自在。若不爾者，不取正覺。
- ⑯設我得佛，國中人天，乃至聞有不善名者，不取正覺。
- ⑰設我得佛，十方世界無量諸佛不悉諮嗟稱我名者，不取正覺。
- ⑱設我得佛，十方眾生，至心信樂，欲生我國，乃至十念，若不生者，不取正覺，唯除五逆、誹謗正法。
- ⑲設我得佛，十方眾生，發菩提心，修諸功德，至心發願欲生我國，臨壽終時，假令不與大眾圍遶現其人前者，不取正覺。
- ⑳設我得佛，十方眾生，聞我名號、繫念我國，殖諸德本、至心迴向，欲生我國，不果遂者，不取正覺。
- ㉑設我得佛，國中人天，不悉成滿三十二大人相者，不取正覺。
- ㉒設我得佛，他方佛土諸菩薩眾來生我國，究竟必至一生補處，除其本願，自在所化，為眾生故，被弘誓鎧，積累德本，度脫一切；遊諸佛國，修菩薩行，供養十方諸佛如來，開化恆沙無量眾生，使立無上正真之道；超出常倫諸地之行，現前修習普賢之德。若不爾者，不取正覺。
- ㉓設我得佛，國中菩薩，承佛神力，供養諸佛，一食之頃，不能遍至無量無數億那由他諸佛國者，不取正覺。
- ㉔設我得佛，國中菩薩，在諸佛前，現其德本，諸所求欲供養之具，若不如意者，不取正覺。
- ㉕設我得佛，國中菩薩，不能演說一切智者，不取正覺。
- ㉖設我得佛，國中菩薩，不得金剛那羅延身者，不取正覺。
- ㉗設我得佛，國中人天、一切萬物，嚴淨光麗，形色殊特，窮微極妙，無能稱量。其諸眾生，乃至逮得天眼，有能明了辯其名數者，不取正覺。
- ㉘設我得佛，國中菩薩，乃至少功德者，不能知見其道場樹無量光色高四百萬里者，不取正覺。
- ㉙設我得佛，國中菩薩，若受讀經法，諷誦持說而不得辯才智慧者，不取正覺。

③⑩設我得佛，國中菩薩，智慧辯才若可限量者，不取正覺。

③⑪設我得佛，國土清淨，皆悉照見十方一切無量無數不可思議諸佛世界，猶如明鏡睹其面像。若不爾者，不取正覺。

③⑫設我得佛，自地以上至于虛空，宮殿、樓觀、池流、花樹，國土所有一切萬物，皆以無量雜寶百千種香而共合成，嚴飾奇妙超諸人天，其香普薰十方世界，菩薩聞者，皆修佛行。若不爾者，不取正覺。

③⑬設我得佛，十方無量不可思議諸佛世界眾生之類，蒙我光明觸其體者，身心柔軟超過人天。若不爾者，不取正覺。

③⑭設我得佛，十方無量不可思議諸佛世界眾生之類，聞我名字，不得菩薩無生法忍、諸深總持者，不取正覺。

③⑮設我得佛，十方無量不可思議諸佛世界，其有女人聞我名字，歡喜信樂，發菩提心，厭惡女身，壽終之後復為女像者，不取正覺。

③⑯設我得佛，十方無量不可思議諸佛世界諸菩薩眾，聞我名字，壽終之後常修梵行至成佛道。若不爾者，不取正覺。

③⑰設我得佛，十方無量不可思議諸佛世界諸天人民，聞我名字，五體投地，稽首作禮，歡喜信樂，修菩薩行，諸天世人莫不致敬。若不爾者，不取正覺。

③⑱設我得佛，國中人天，欲得衣服，隨念即至，如佛所讚應法妙服，自然在身。若有裁縫、染治、浣濯者，不取正覺。

③⑲設我得佛，國中人天，所受快樂，不如漏盡比丘者，不取正覺。

④⑰設我得佛，國中菩薩，隨意欲見十方無量嚴淨佛土，應時如願，於寶樹中皆悉照見，猶如明鏡睹其面像。若不爾者，不取正覺。

④⑱設我得佛，他方國土諸菩薩眾，聞我名字，至于得佛，諸根缺陋，不具足者，不取正覺。

④⑲設我得佛，他方國土諸菩薩眾，聞我名字，皆悉速得清淨解脫三昧，住是三昧，一發意頃，供養無量不可思議諸佛世尊而不失定意。若不爾者，不取正覺。

G02 願得眷屬

④⑳設我得佛，他方國土諸菩薩眾，聞我名字，壽終之後，生尊貴家。若不爾者，不取正覺。

④㉑設我得佛，他方國土諸菩薩眾，聞我名字，歡喜踊躍，修菩薩行，具足德本。若不爾者，不取正覺。

④⑤設我得佛，他方國土諸菩薩眾，聞我名字，皆悉速得普等三昧，住是三昧至于成佛，常見無量不可思議一切如來。若不爾者，不取正覺。

G03 願得法身

④⑥設我得佛，國中菩薩，隨其志願，所欲聞法，自然得聞。若不爾者，不取正覺。

④⑦設我得佛，他方國土諸菩薩眾聞我名字，不即得至不退轉者，不取正覺。

④⑧設我得佛，他方國土諸菩薩眾，聞我名字，不即得至第一忍、第二、第三法忍，於諸佛法，不能即得不退轉者，不取正覺。」

F02 明說誓要願

佛告阿難：爾時，法藏比丘說此願已。而說頌曰：
自有三階明義：①正誓，②誓後更願，③說誓要瑞。

G01 正誓

我建超世願	必至無上道	斯願不滿足	誓不成等覺
我於無量劫	不為大施主	普濟諸貧苦	誓不成等覺
我至成佛道	名聲超十方	究竟靡不聞	誓不成等覺

G02 誓後更願

離欲深正念	淨慧修梵行	志求無上道	為諸天人師
神力演大光	普照無際土	消除三垢冥	明濟眾厄難
開彼智慧眼	滅此昏盲闇	閉塞諸惡道	通達善趣門
功祚成滿足	威曜朗十方	日月戢重暉	天光隱不現
為眾開法藏	廣施功德寶	常於大眾中	說法師子吼
供養一切佛	具足眾德本	願慧悉成滿	得為三界雄
如佛無礙智	通達靡不照	願我功德力	等此最勝尊

日月戢重暉者，戢之言集，明日月光雜耀，皆入如來德之內。

G03 說誓要瑞

斯願若剋果	大千應感動	虛空諸天人	當雨珍妙花
-------	-------	-------	-------

F03 感瑞證成

佛語阿難：法藏比丘說此頌已，應時普地六種震動，天雨妙花以散其上。自然音樂，空中讚言：決定必成無上正覺。

地動，表皆行因。雨花，明必得果。自然音樂，證妙樂之土，說法化物也。

E04 明今釋迦說法藏順願之行

就中有二：①牒誓願，②明修行之事。

F01 牒誓願

於是，法藏比丘具足修滿如是大願，誠諦不虛，超出世間深樂寂滅。
阿難！法藏比丘於彼佛所，諸天、魔、梵、龍神八部大眾之中，發斯弘誓。

F02 明修行之事

建此願已，一向專志莊嚴妙土。所修佛國，開廓廣大，超勝獨妙。
將欲顯其修行，舉所修國土，恢廓廣蕩也。廓，以安眾為義，明淨土廣安往生之眾，蕩然無限極也。

建立常然，無衰、無變。
於此間壞劫，而彼無改，相續常然。
於不可思議兆載永劫積殖菩薩無量德行。
正明修行久遠，是非數之極名。

不生欲覺、瞋覺、害覺，不起欲想、瞋想、害想，不著色聲香味觸法。忍力成就，不計眾苦。少欲知足，無染恚癡，三昧常寂，智慧無礙。無有虛偽諂曲之心，和顏軟語，先意承問。勇猛精進，志願無倦。專求清白之法，以慧利群生。

明六度行之相。
恭敬三寶，奉事師長。以大莊嚴具足眾行，令諸眾生功德成就。
住空、無相、無願之法，無作、無起，觀法如化。
明供養三寶修三。
遠離粗言、自害、害彼、彼此俱害。修習善語，自利利人、彼我兼利。棄國捐王，絕去財色。自行六波羅蜜，教人令行，無央數劫積功累德。

明出家修自行外化。
隨其生處，在意所欲，無量寶藏自然發應，教化安立無數眾生，住於無上正真之道。或為長者、居士、豪姓、尊貴，或為剎利國君、轉輪聖帝，或為六欲天主乃至梵王。常以四事供養恭敬一切諸佛。如是功德不可稱說。

口氣香潔如優鉢羅花，身諸毛孔出栴檀香，其香普熏無量世界。容色端正，相好殊妙。其手常出無盡之寶，衣服、飲食，珍妙花香，繒蓋幢幡莊嚴之具。如是等事，超諸人天，於一切法而得自在。

明生處行。行應生得果報，以修自行外化也。夫三毒之覺，能起犯戒之心。今不起此覺及想，又不著六塵，故不犯戒也。但施度之要，莫過法施。專求清白無漏之解為眾生說，即是施度耳。

C02 明得淨土妙果

就中有二：①略辨得果②。

D01 略辨得果

於略明中：①明法身，②明淨土。

E01 明法身

阿難白佛：法藏菩薩為已成佛而取滅度？為未成佛？為今現在？

佛告阿難：法藏菩薩今已成佛，現在西方，去此十萬億剎。其佛世界，名曰安樂。

阿難又問：其佛成道已來，為經幾時？

佛言：成佛已來，凡歷十劫。

初問得佛，後問久遠時節。

E02 明淨土

其佛國土，自然七寶，金、銀、琉璃、珊瑚、琥珀、硨磲、瑪瑙，合成為地，恢廓曠蕩，不可限極。悉相雜廁，轉相間入，光赫煜耀，微妙奇麗，清淨莊嚴，超踰十方一切世界眾寶中精，其寶猶如第六天寶。

又，其國土無須彌山，及金剛圍一切諸山，亦無大海、小海、溪渠、井谷。佛神力故，欲見則見。亦無地獄、餓鬼、畜生諸難之趣。亦無四時春夏秋冬夏，不寒不熱，常和調適。

明無穢、無有高下，諸山及四時節也。然眾生欲見，佛神力現之耳。

爾時，阿難白佛言：世尊！若彼國土，無須彌山，其四天王及忉利天，依何而住？

佛語阿難：第三炎天乃至色究竟天，皆依何住？

阿難白佛：行業果報不可思議。

佛語阿難：行業果報不可思議，諸佛世界亦不可思議。其諸眾生，功德善力住行業之地，故能爾耳。

阿難白佛：我不疑此法，但為將來眾生欲除其疑惑，故問斯義。

因之問無須彌山者，彼四天及忉利天何得住。釋當來之疑，有五意可解。

D02 廣明得果

有二：①明佛果，②明淨土果。

E01 明佛果

有三：①明光明果，②明其壽長遠，③明眾數難量。

F01 明光明果

佛告阿難：無量壽佛威神光明，最尊第一，諸佛光明所不能及。
正明光。
或有佛光照百佛世界、或千佛世界。取要言之，乃照東方恆沙佛剎。南西北
方四維上下亦復如是。
或有佛光照于七尺，或一由旬，二三四五由旬，如是轉倍，乃至照一佛剎。
明照佛土用。
是故無量壽佛，號無量光佛、無邊光佛、無礙光佛、無對光佛、炎王光佛、
清淨光佛、歡喜光佛、智慧光佛、不斷光佛、難思光佛、無稱光佛、超日月光
佛。
明因光得名。
其有眾生遇斯光者，三垢消滅，身意柔軟，歡喜踊躍，善心生焉。若在三塗
極苦之處，見此光明，皆得休息，無復苦惱。壽終之後，皆蒙解脫。
無量壽佛光明顯赫，照曜十方諸佛國土，莫不聞焉。不但我今稱其光明，一
切諸佛、聲聞、緣覺、諸菩薩眾咸共歎譽，亦復如是。
明得益，能滅三毒三垢。
若有眾生聞其光明威神功德，日夜稱說，至心不斷，隨意所願，得生其國，
為諸菩薩、聲聞之眾所共歎譽稱其功德。至其然後得佛道時，普為十方諸佛菩
薩歎其光明，亦如今也。
佛言：我說無量壽佛光明威神巍巍殊妙，晝夜一劫，尚不能盡。
聞光明稱說者，得生彼國。及其成佛，復為十方之所稱說。

F02 明其壽長遠

有二：①明彼佛壽，②明聲聞天人壽命長遠。

G01 明彼佛壽

佛語阿難：無量壽佛，壽命長久，不可稱計。汝寧知乎？
假使十方世界無量眾生皆得人身，悉令成就聲聞、緣覺，都共集會，禪思一
心，竭其智力，於百千萬劫，悉共推算，計其壽命長遠劫數，不能窮盡知其限
極。
明彼佛壽。
G02 明聲聞天人壽命長遠

聲聞、菩薩、天人之眾壽命長短，亦復如是，非算數譬喻所能知也。
明聲聞天人壽命長遠。

F03 明眾數難量

有二：①總明眾數多少 略嘆眾德，②的辨三會數。

G01 總明眾數多少 略嘆眾德

又，聲聞菩薩，其數難量，不可稱說。

明眾數非算計能知。

神智洞達，威力自在，能於掌中持一切世界。

G02 的辨三會數

有三：①法說，②譬，③合。

H01 法說

佛語阿難：彼佛初會，聲聞眾數不可稱計，菩薩亦然。如大目犍連，百千萬億無量無數，於阿僧祇那由他劫乃至滅度，悉共計校，不能究了多少之數。

明此初會，尚非目連等所知，豈況後兩會數可知乎！

H02 譬

譬如大海，深廣無量。假使有人，析其一毛以為百分，以一分毛沾取一滴。於意云何，其所滴者，於彼大海，何所為多？

阿難白佛：彼所滴水比於大海多少之量，非巧歷算數、言辭譬類所能知也。

H03 合

佛語阿難：如目連等，於百千萬億那由他劫計彼初會聲聞菩薩，所知數者，猶如一滴；其所不知，如大海水。

E02 明淨土果

明淨土果亦有二：①正國土莊嚴，②明國中人物美妙。

F01 明國土莊嚴

國土中自有四重：①明寶樹莊嚴，②明伎樂，③明講堂樓觀莊嚴，④明有好寶池莊嚴。

G01 明寶樹莊嚴

於中有二：①明諸樹，②別明菩提樹。

H01 明諸樹

又，其國土，七寶諸樹周滿世界。金樹、銀樹、琉璃樹、玻瓈樹、珊瑚樹、瑪瑙樹、硨磲樹，或有二寶、三寶，乃至七寶轉共合成。

明七寶所成。

或有金樹，銀葉花果；或有銀樹，金葉花果。

或琉璃樹，玻瓈為葉花果，亦然；（玻瓈樹，琉璃為葉花果）

或水精樹，琉璃為葉花果，亦然；（琉璃樹，水精為葉花果）
 或珊瑚樹，瑪瑙為葉花果，亦然；（瑪瑙樹，珊瑚為葉花果）
 或瑪瑙樹，琉璃為葉花果，亦然；（琉璃樹，瑪瑙為葉花果）
 或砮磈樹，眾寶為葉花果，亦然。（眾寶樹，砮磈為葉花果）
 明花葉相間。

或有寶樹，紫金為本、白銀為莖、琉璃為枝、水精為條、珊瑚為葉、瑪瑙為花、砮磈為實；

或有寶樹，白銀為本、琉璃為莖、水精為枝、珊瑚為條、瑪瑙為葉、砮磈為花、紫金為實；

或有寶樹，琉璃為本、水精為莖、珊瑚為枝、瑪瑙為條、砮磈為葉、紫金為花、白銀為實；

或有寶樹，水精為本、珊瑚為莖、瑪瑙為枝、砮磈為條、紫金為葉、白銀為花、琉璃為實；

或有寶樹，珊瑚為本、瑪瑙為莖、砮磈為枝、紫金為條、白銀為葉、琉璃為花、水精為實；

或有寶樹，瑪瑙為本、砮磈為莖、紫金為枝、白銀為條、琉璃為葉、水精為花、珊瑚為實；

或有寶樹，砮磈為本、紫金為莖、白銀為枝、琉璃為條、水精為葉、珊瑚為花、瑪瑙為實。

行行相值、莖莖相望、枝枝相準、葉葉相向、花花相順、實實相當。榮色光曜，不可勝視。

明行列可觀。

清風時發，出五音聲，微妙宮商自然相和。

明有出好音聲之用。

J02 菩提樹

又，無量壽佛其道場樹：

高四百萬里，其本周圍五千由旬，枝葉四布二十萬里。

一切眾寶自然合成，以月光摩尼持海輪寶，眾寶之王，而莊嚴之。

周匝條間，垂寶瓔珞。

百千萬色種種異變，無量光炎照曜無極。

珍妙寶網羅覆其上。

一切莊嚴隨應而現。

明樹體。

微風徐動，吹諸寶樹，演出無量妙法音聲，其聲流布遍諸佛國。

聞其音者，得深法忍，住不退轉，至成佛道；耳根清徹，不遭苦患；

目睹其色、耳聞其音、鼻知其香、舌嘗其味、身觸其光、心以法緣，皆得甚深法忍，住不退轉，至成佛道。六根清徹，無諸惱患。

明利益物用。樹出好聲，使聞見者得深法，又得六根清淨。

阿難！若彼國土人天，見此樹者，得三法忍：一者音響忍，二者柔順忍，三者無生法忍。此皆無量壽佛威神力故、本願力故、滿足願故、明了願故、堅固願故、究竟願故。

舉本願，釋得益之意。

H02 明伎樂

佛告阿難：世間帝王，有百千音樂，自轉輪聖王乃至第六天上，伎樂音聲，展轉相勝千億萬倍。

第六天上萬種樂音，不如無量壽國諸七寶樹一種音聲千億倍也，亦有自然萬種伎樂。

又，其樂聲無非法音，清暢哀亮，微妙和雅，十方世界音聲之中最為第一。

H03 明講堂樓觀莊嚴

其講堂、精舍、宮殿、樓觀，皆七寶莊嚴，自然化成。復以真珠、明月摩尼眾寶以為交絡，覆蓋其上。

H04 明有好寶池莊嚴

有四：①明池縱廣，②明有妙好水，③明有好花，④明池水功用。

I01 明池縱廣

內外左右有諸浴池，或十由旬，或二十、三十，乃至百千由旬，縱廣深淺，各皆一等。八功德水湛然盈滿，清淨香潔，味如甘露。

I02 明有妙好水

黃金池者，底白銀沙；白銀池者，底黃金沙；

水精池者，底琉璃沙；琉璃池者，底水精沙；

珊瑚池者，底琥珀沙；琥珀池者，底珊瑚沙；

碑磲池者，底瑪瑙沙；瑪瑙池者，底碑磲沙；

白玉池者，底紫金沙；紫金池者，底白玉沙；

或二寶、三寶，乃至七寶，轉共合成。

既作七寶色，故云黃金等也。

I03 明有好花

其池岸上，有栴檀樹，花葉垂布，香氣普熏。天優鉢羅花、鉢曇摩花、拘牟頭花、分陀利花，雜色光茂彌覆水上。

I04 明池水功用

彼諸菩薩及聲聞眾，若入寶池，意欲令水沒足，水即沒足；欲令至膝，即至于膝；欲令至腰，水即至腰；欲令至頸，水即至頸；欲令灌身，自然灌身；欲令還復，水輒還復。調和冷暖，自然隨意，開神悅體，蕩除心垢，清明澄潔，淨若無形。

寶沙映徹，無深不照，微瀾迴流，轉相灌注，安詳徐逝，不遲不疾。

波揚無量，自然妙聲，隨其所應，莫不聞者。或聞佛聲，或聞法聲，或聞僧聲，或寂靜聲、空無我聲、大慈悲聲、波羅蜜聲，或十力無畏不共法聲、諸通慧聲、無所作聲、不起滅聲、無生忍聲，乃至甘露灌頂眾妙法聲。如是等聲，稱其所聞，歡喜無量。

隨順清淨離欲寂滅真實之義、隨順三寶力無所畏不共之法、隨順通慧菩薩聲聞所行之道。

無有三塗苦難之名，但有自然快樂之音，是故其國名曰極樂。

明池水有開神悅體，滅惡生善，及出好聲。

詮辨三寶萬行等事，無有惡聲，不過之事也。

F02 明人物美妙

阿難！彼佛國土諸往生者，具足如是清淨色身、諸妙音聲、神通功德。所處宮殿、衣服、飲食、眾妙花香莊嚴之具，猶第六天自然之物。

若欲食時，七寶應器自然在前，金、銀、琉璃、硨磲、瑪瑙、珊瑚、虎珀、明月真珠如是眾鉢隨意而至。百味飲食，自然盈滿。雖有此食，實無食者，但見色、聞香，意以為食，自然飽足，身心柔軟，無所味著。事已化去，時至復現。

彼佛國土清淨安隱，微妙快樂，次於無為泥洹之道。

遍明飯食七寶器及百味等事。

其諸聲聞、菩薩、人、天，智慧高明，神通洞達。咸同一類，形無異狀，但因順餘方，故有人、天之名。顏貌端正，超世希有，容色微妙，非天、非人，皆受自然虛無之身、無極之體。

遍明正報略歎。

神通智慧洞達咸同一狀者，明形類是同。

稟受虛無之身無極之體者，以神通無所不至故。

無極之體色如光影故，云虛無之身，非意無色狀也。

佛告阿難：譬如世間貧窮乞人在帝王邊，形貌容狀，寧可類乎？

阿難白佛：假令此人在帝王邊，羸陋醜惡，無以為喻，百千萬億不可計倍。所以然者，貧窮乞人底極廝下，衣不蔽形，食趣支命，飢寒困苦，人理殆盡。皆坐前世不殖德本，積財不施、富有益慳，但欲唐得、貪求無厭，不信修善、犯惡山積。如是壽終，財寶消散，苦身積聚為之憂惱，於己無益，徒為他有。無善可怙，無德可恃。是故，死墮惡趣，受此長苦。罪畢得出，生為下賤，愚鄙斯極示同人類。所以世間帝王，人中獨尊，皆由宿世積德所致，慈惠博施，仁愛兼濟，履信修善，無所違爭。是以壽終，福應得昇善道，上生天上，享茲福樂。積善餘慶，今得為人，乃生王家，自然尊貴，儀容端正，眾所敬事，妙衣珍膳隨心服御。宿福所迫，故能致此。

佛告阿難：汝言是也。計如帝王，雖人中尊貴，形色端正，比之轉輪聖王，甚為鄙陋，猶彼乞人在帝王邊也。轉輪聖王，威相殊妙，天下第一，比忉利天王，又復醜惡，不得相喻，萬億倍也。假令天帝比第六天王，百千億倍，不相類也。設第六天王比無量壽佛國菩薩、聲聞，光顏容色，不相及逮，百千萬億不可計倍。

欲顯形狀之勝，作問答较量。

佛告阿難：無量壽國其諸天人，衣服、飲食、花香、瓔珞、繒蓋幢幡、微妙音聲，所居舍宅、宮殿、樓閣，稱其形色、高下、大小。或一寶、二寶，乃至無量眾寶，隨意所欲，應念即至。

明正報所處宮殿。

又，以眾寶妙衣遍布其地，一切人天踐之而行。無量寶網彌覆佛上，皆以金縷、真珠、百千雜寶、奇妙珍異莊嚴校飾，周匝四面垂以寶鈴，光色晃曜盡極嚴麗。

別明依報勝。

自然德風，徐起微動。其風調和，不寒、不暑；溫涼柔軟，不遲、不疾。吹諸羅網及眾寶樹，演發無量微妙法音，流布萬種溫雅德香。其有聞者，塵勞垢習自然不起。風觸其身，皆得快樂，譬如比丘得滅盡三昧。

又，風吹散花，遍滿佛土，隨色次第而不雜亂。柔軟光澤，馨香芬烈，足履其上，陷下四寸，隨舉足已，還復如故。花用已訖，地輒開裂，以次化沒，清淨無遺。隨其時節，風吹散花，如是六反。

明有好風。

又，眾寶蓮花周滿世界，一一寶花，百千億葉，其葉光明無量種色，青色青光、白色白光，玄黃朱紫，光色赫然，煒燁煥爛，明曜日月。

一一花中，出三十六百千億光。一一光中，出三十六百千億佛，身色紫金，相好殊特。一一諸佛，又放百千光明，普為十方說微妙法。如是諸佛，各各安立無量眾生於佛正道。

明有好花也。

煥爛者，煥之意照，爛之言香。明照及有香也。

B02 勸物修因 往生彼土

就中有二：①示修因方法，②勸物修因往生。

C01 示修因方法

有二：①略明生因，②廣明三輩。

D01 略明生因

佛告阿難：其有眾生生彼國者，皆悉住於正定之聚。所以者何？彼佛國中，無諸邪聚及不定之聚。

舉定聚引物，明生彼土者，必入定位。以彼土無有邪聚及不定位故也。

十方恆沙諸佛如來皆共讚歎無量壽佛威神功德不可思議。

明恆沙佛皆共讚嘆也。

諸有眾生聞其名號，信心歡喜，乃至一念，至心迴向願生彼國，即得往生，住不退轉，唯除五逆、誹謗正法。

明彼土純有正定善人，無邪惡之人。故十方諸天人聞名，欲往生者，應須發願生。

略示往生之因，是發心一向等也。

D02 廣明三輩

佛告阿難：十方世界諸天人民，其有至心願生彼國，凡有三輩。

廣辨承業往生者，有三輩人，即示修因之方法。三輩即為三。

其上輩者，捨家棄欲而作沙門，發菩提心，一向專念無量壽佛，修諸功德，願生彼國。

此等眾生，臨壽終時，無量壽佛與諸大眾現其人前。即隨彼佛，往生其國。便於七寶花中，自然化生，住不退轉，智慧勇猛，神通自在。

是故，阿難！其有眾生，欲於今世見無量壽佛，應發無上菩提之心，修行功德，願生彼國。

初輩人，能出家棄欲；又發菩提心，復能專念；又修諸功德而迴向。此人臨終，承業往生，住不退轉也。

此中，上輩人是觀經九輩中，上品中人。何以得知？彼云上品中者，明佛乘寶臺來迎，足蹈七寶花中，此中亦云七寶花，故知是也。

佛語阿難：其中輩者，十方世界諸天人民，其有至心，願生彼國，雖不能行作沙門，大修功德，當發無上菩提之心，一向專念無量壽佛。多少修善、奉持齋戒、起立塔像、飯食沙門、懸繒然燈、散花燒香。以此迴向，願生彼國。

其人臨終，無量壽佛化現其身，光明相好，具如真佛，與諸大眾現其人前。即隨化佛，往生其國，住不退轉。功德智慧，次如上輩者也。

中輩人雖不出家，而能大修功德；又能發菩提心，復專念示，皆迴向發願。此人亦承業往生，住不退轉也。

此中，中輩人應是觀經中品，中上品及中中品人。何以知之？彼文明有佛來迎，而中下品不明佛來，故知之也。

佛語阿難：其下輩者，十方世界諸天人民，其有至心欲生彼國，假使不能作諸功德，當發無上菩提之心，一向專意，乃至十念念無量壽佛，願生其國。若聞深法，歡喜信樂，不生疑惑。乃至一念，念於彼佛，以至誠心，願生其國。

此人臨終，夢見彼佛，亦得往生。功德智慧，次如中輩者也。

下輩能發心，又能專念，亦能發願，又能信樂。此人承業往生，亦住不退轉也。

此中，下品人應是觀經下下品人。何以知之？後文辨下下，成就十念得生，今亦然也。

結三輩人，皆菩提心為正因，餘行為緣因。因既有三，品而同招。

壽無量者，既同求無盡種智。

又，盡求度一切眾生，此業與法性無量，故得壽同，出算數之外，同云無量也。而報因有勝劣，果應有勝負也。

C02 勸物修因往生

①舉彼出勝妙伎樂以引物，②明娑婆雜惡可棄，③現西方之相勸物信。

D01 舉彼出勝妙伎樂以引物

明勝妙中有二重：①明勝妙快樂，②引物修因急往生也。

E01 明勝妙快樂

有二：①明十方諸佛讚嘆供養彼佛，②明釋迦讚美彼土勝妙快樂。

F01 明十方諸佛讚嘆供養彼佛

佛告阿難：無量壽佛威神無極，十方世界無量無邊不可思議諸佛如來莫不稱歎。

G01 明十方菩薩往觀

於彼東方恆河沙佛國無量無數諸菩薩眾，皆悉往詣無量壽佛所，恭敬供養，及諸菩薩、聲聞大眾，聽受經法，宣布道化。南西北方四維上下亦復如是。

爾時，世尊而說頌曰：

東方諸佛國 其數如恆沙 彼土諸菩薩 往觀無量覺
南西北四維 上下亦復然 彼土菩薩眾 往觀無量覺

H01 明身業供養

一切諸菩薩 各齎天妙花 寶香無價衣 供養無量覺

H02 明口業供養

咸然奏天樂 暢發和雅音 歌歎最勝尊 供養無量覺
究達神通慧 遊入深法門 具足功德藏 妙智無等倫
慧日朗世間 消除生死雲 恭敬遶三匝 稽首無上尊

咸之言同，奏之言作也。

H03 明意業供養

見彼嚴淨土 微妙難思議 因發無量心 願我國亦然

明十方諸佛令眾生發心。既發心，上合佛意，故云發心為供養也。

G02 明彼佛為往菩薩授記

有二：①明授記之相，②正明授記。

H01 明授記之相

應時無量尊 動容發欣笑 口出無數光 遍照十方國
迴光圍遶身 三匝從頂入

表得時機，所以欣笑口出光。
還從頂入者，表吐言說為物授，至極法身之記也。

一切天人眾 踊躍皆歡喜

明人天知相而歡喜。

大士觀世音 整服稽首問 白佛何緣笑 唯然願說意
觀音明表相之喜。

梵聲猶雷震 八音暢妙響 當授菩薩記 今說仁諦聽
佛答以誠聽也。

八音者，①嚮，②徹，③清，④柔，⑤哀，⑥高，⑦和，⑧雅。

H02 正明授記

十方來正士 吾悉知彼願 志求嚴淨土 受決當作佛
覺了一切法 猶如夢幻響 滿足諸妙願 必成如是剎
有願故記。

知法如電影 究竟菩薩道 具諸功德本 受決當作佛
有功德故記。

通達諸法性 一切空無我 專求淨佛土 必成如是剎
有空有解故記。

G03 明十方諸佛 各命其土菩薩 令往安養國 供養聽法

諸佛告菩薩 令覲安養佛 聞法樂受行 疾得清淨處
至彼嚴淨土 便速得神通 必於無量尊 受記成等覺
其佛本願力 聞名欲往生 皆悉到彼國 自致不退轉
佛命往生安養國。

菩薩興至願 願己國無異 普念度一切 名顯滿十方
奉事億如來 飛化遍諸剎 恭敬歡喜去 還到安養國
明菩薩受命而往。

G04 明經教難聞 教物生信

有三：①正嘆聞經，②舉所證理，③舉諸難以教物生信。

H01 正嘆聞經

若人無善本 不得聞此經 清淨有戒者 乃獲聞正法
曾更見世尊 則能信此事 謙敬聞奉行 踊躍大歡喜
憍慢弊懈怠 難以信此法 宿世見諸佛 樂聽如是教

H02 舉所證理

聲聞或菩薩 莫能究聖心 譬如從生盲 欲行開導人
如來智慧海 深廣無涯底 二乘非所測 唯佛獨明了
假使一切人 具足皆得道 淨慧知本空 億劫思佛智
窮力極講說 盡壽猶不知 佛慧無邊際 如是致清淨
釋能詮之文，難得值聞。

H03 舉諸難以教物生信

壽命甚難得 佛世亦難值 人有信慧難 若聞精進求
聞法能不忘 見敬得大慶 則我善親友 是故當發意

設滿世界火 必過要聞法 會當成佛道 廣濟生死流

F02 明釋迦讚美彼土勝妙快樂

於中有二：①明彼土人天眷屬勝妙，②明彼佛為眾說法之眾盛事。

G01 明彼土人天眷屬勝妙

眷屬德中有二：

- ①明諸菩薩人天觀音大勢至等智德勝，
- ②遍明彼土人物神通供養稱意自在之德。

H01 明諸菩薩人天觀音大勢至等智德勝

佛告阿難：彼國菩薩，皆當究竟一生補處，除其本願為眾生故，以弘誓功德而自莊嚴，普欲度脫一切眾生。

阿難！彼佛國中，諸聲聞眾身光一尋，菩薩光明照百由旬。有二菩薩，最尊第一，威神光明普照三千大千世界。

阿難白佛：彼二菩薩，其號云何？

佛言：一名觀世音，二名大勢至。是二菩薩，於此國土修菩薩行，命終轉化生彼佛國。

H02 遍明彼土人物神通供養稱意自在之德

阿難！其有眾生，生彼國者，皆悉具足三十二相。智慧成滿，深入諸法，究暢要妙，神通無礙，諸根明利。其鈍根者，成就二忍；其利根者，得阿僧祇無生法忍。

又，彼菩薩，乃至成佛，不更惡趣。神通自在，常識宿命。除生他方五濁惡世，示現同彼，如我國也。

佛語阿難：彼國菩薩，承佛威神，一食之頃，往詣十方無量世界，恭敬供養諸佛世尊。隨心所念，花香、伎樂、繒蓋、幢幡，無數無量供養之具，自然化生，應念即至，珍妙殊特非世所有。輒以奉散諸佛、及諸菩薩、聲聞大眾。在虛空中，化成花蓋，光色昱爍，香氣普熏。其花周圓，四百里者，如是轉倍，乃覆三千大千世界，隨其前後以次化沒。其諸菩薩僉然欣悅，於虛空中共奏天樂，以微妙音歌歎佛德，聽受經法，歡喜無量。供養佛已、未食之前，忽然輕舉還其本國。

G02 明彼佛為眾說法之眾盛事

有二：①明佛說，②明菩薩說。

H01 明佛說

佛語阿難：無量壽佛，為諸聲聞、菩薩大眾班宣法時，都悉集會七寶講堂，

廣宣道教，演暢妙法，莫不歡喜，心解得道。即時四方自然風起，普吹寶樹，出五音聲。無量妙花，隨風四散，自然供養，如是不絕。一切諸天皆齎天上百千花香、萬種伎樂，供養其佛及諸菩薩、聲聞之眾，普散花香、奏諸音樂，前後來往更相開避。當斯之時，熙然快樂，不可勝言。

莫不歡喜者，明皆得解。

即時自然風起者，明說法時，有勝樂事供養於佛，樂難可勝言也。

H02 明菩薩說

有二：①明說無乖違，②嘆德。

I01 明說無乖違

佛告阿難：生彼佛國諸菩薩等，所可講說班宣正法，隨順智慧，無違無失。

菩薩說，即是傳佛語。班之言布，亦云次也。

I02 嘆德

嘆德有三：①法說嘆，②寄譬嘆，③還法說嘆。

J01 法說嘆

有六：①歎無染著德，②歎四等德，③明有尊重法樂好德，④明有五眼德，⑤明辯德，⑥明自行外化德。

K01 歎無染著德

於其國土，所有萬物，無我所心、無染著心。去來進止，情無所繫，隨意自在，無所適莫，無彼、無我，無競、無訟。

云無競訟，無適莫也。

K02 歎四等德

於諸眾生，得大慈悲，饒益之心；柔潤調伏，無忿恨心；離蓋清淨，無厭怠心；等心、勝心、深心、定心。

K03 明有尊重法樂好德

愛法、樂法、喜法之心，滅諸煩惱，離惡趣心。究竟一切菩薩所行，具足成就無量功德。得深禪定諸通明慧，遊志七覺。

K04 明有五眼德

修心佛法：肉眼清徹，靡不分了；天眼通達，無量無限；法眼觀察，究竟諸道；慧眼見真，能度彼岸；佛眼具足，覺了法性。

K05 明辯德

以無礙智，為人演說。等觀三界，空無所有。志求佛法，具諸辯才，除滅眾生煩惱之患。從如來生，解法如如。

善知集滅音聲方便，不欣世語，樂在正論。

志求佛法，法無礙。從如來生，解法如如，義無礙。善知習滅音聲，明辭無礙。

K06 明自行外化德

有二：①自行德，②外化德。

L01 自行德

修諸善本，志崇佛道。知一切法，皆悉寂滅。生身煩惱，二餘俱盡。聞甚深法，心不疑懼。

生身煩惱者，歎自行盡見思正使也。二餘俱盡者，二眾習盡。

L02 外化德

常能修行，其大悲者：

深遠微妙，靡不覆載，究竟一乘，至于彼岸；

靡不覆載者，內德既備善，能覆眾生也。

因行自能究故，能至彼泥洹之岸。

決斷疑網，慧由心出。於佛教法，該羅無外；

決斷疑網者，能斷眾生疑。明鑒從內心而出，不明師諮也。

該羅者，該之言及，羅之言攝。明解佛法，弘廣萬法，無蓋盡也。

J02 寄譬嘆

智慧如大海、三昧如山王。慧光明淨，超踰日月。清白之法，具足圓滿；

猶如雪山，照諸功德，等一淨故；

猶如大地，淨穢好惡，無異心故；

猶如淨水，洗除塵勞諸垢染故；

猶如火王，燒滅一切煩惱薪故；

猶如大風，行諸世界，無障礙故；

猶如虛空，於一切有，無所著故；

猶如蓮花，於諸世間，無染污故；

猶如大乘，運載群萌，出生死故；

猶如重雲，震大法雷，覺未覺故；

猶如大雨，雨甘露法，潤眾生故；

如金剛山，眾魔外道不能動故；

如梵天王，於諸善法，最上首故；

如尼拘類樹，普覆一切故；

8

如優曇鉢花，希有難遇故；
如金翅鳥，威伏外道故；
如眾遊禽，無所藏積故；
猶如牛王，無能勝故；
猶如象王，善調伏故；
如師子王，無所畏故；
譬說有二十句。
曠若虛空，大慈等故；
摧滅嫉心，不忌勝故；
專樂求法，心無厭足；
常欲廣說，志無疲倦。
擊法鼓、建法幢、曜慧日、除癡闇；

J03 還法說嘆

文復有四別：①明有法施之德，②以大悲為首歎之，③以諸力解歎之，④色身為首歎之。

16

K01 明有法施之德

修六和敬、常行法施，志勇精進，心不退弱；
為世燈明、最勝福田，常為師導，等無憎愛；
唯樂正道，無餘欣感。

即以六和敬為首歎之。六和者，謂①戒同，②見同，③利養同，④身同，⑤口同，⑥意同也。

K02 以大悲為首歎之

拔諸欲刺以安群生。功德殊勝，莫不尊敬，滅三垢障，遊諸神通；

24

K03 以諸力解歎之

因力、緣力、意力、願力、方便之力、常力、善力、定力、慧力、多聞之力；施、戒、忍辱、精進、禪定、智慧之力；正念、止觀；諸通、明力。如法調伏諸眾生力。如是等力，一切具足。

恒照大乘之因，以化物故，云因力。
照眾生所藉之緣，名緣力。
願力者，內有重願度一切也。
方便力者，有巧度之解也。
常不捨此願，欲利安物，明善力也。

32

在境不亂，明定力。
鑒而不闇，名慧力。
能隨萬種為說，名多聞力。
施戒忍等力者，以六度化物也。
諸通明力者，以神通三明化之力也。
如法調伏諸眾生力者，柔者，以法調之；剛者，以勢伏之。
如是等，結歎諸力也。

8 **K04 色身為首歎之**

身色相好，功德、辯才具足莊嚴，無與等者；
恭敬供養無量諸佛，常為諸佛所共稱歎；
究竟菩薩諸波羅蜜，修空無相無願三昧、不生不滅諸三昧門，遠離聲聞緣覺之地。

J04 歎竟結歎

阿難！彼諸菩薩成就如是無量功德，我但為汝略言之耳。若廣說者，百千萬劫，不能窮盡。

16 **E02 引物修因 急往生也**

有二：①牒別人淨，②牒土淨。

F01 牒別人淨

佛告彌勒菩薩、諸天、人等：無量壽國，聲聞、菩薩功德智慧，不可稱說。

F02 牒土淨

又，其國土微妙安樂，清淨若此。何不力為善，念道之自然，著於無上下，洞達無邊際！

何不力為善者，勸修因。
念道之自然者，念於彼土勝妙功德果，自然而應也。
著於無上下者，著之意證，證果無有形色上下，好醜之異。
洞達，是智無邊際，是真諦境。此明正報果。
宜各勤精進，努力自求之，必得超絕去，往生安養國。
勸令勤策，善因必得於妙果。
橫截五惡趣，惡趣自然閉。
修菩提因，則橫斷六道流轉，故云惡趣自然閉也。
昇道無窮極，易往而無人。
去者既多，故云無窮極。只修十念成就，即得往生，而行者希，故云易往而

32

無人也。

其國不逆違，自然之所牽。

牽此二句，釋易往義。明修因竅招果，則為此果所牽也。

何不棄世事，勤行求道德，可得極長生，壽樂無有極！

結勸之句也。

D02 明娑婆雜惡可棄

此中有二：①貶毀，②勸物修出離善。

E01 貶毀

貶毀，汎舉造惡人。

然世人薄俗，共諍不急之事。於此劇惡極苦之中，勤身營務，以自給濟。

薄俗者，心愚少智，故云薄俗。皆各己諍利，以自給濟。

無尊、無卑，無貧、無富，少、長、男、女，共憂錢財，有無同然，憂思適等。

無尊無卑，出作惡之人。

屏營愁苦，累念積慮，為心走使，無有安時。

累念積慮，明貪心財，相積不捨，勤求無寧，故為心走使。

有田憂田、有宅憂宅，牛馬六畜、奴婢、錢財、衣食、什物，復共憂之。

廣富人多求之苦。衣食什物，什之言眾也。

重思累息，憂念愁怖。

憂念愁怖，前明求苦，此明守護之苦。

橫為非常、水、火、盜賊、怨家、債主、焚漂劫奪，消散磨滅，憂毒忪忪，無有解時。

怨家，忽可頓覆也。忪忪者，明其悲哀。

結憤心中，不離憂惱，心堅意固，適無縱捨。

結憤，明其生瞋。

或坐摧碎，身亡命終，棄捐之去，莫誰隨者。

尊貴、豪富亦有斯患，憂懼萬端，勤苦若此，結眾寒熱，與痛共俱。

憂懼萬端，前明求財。勤苦若此，結失財之苦。

結眾寒熱者，結之意集，意行苦招寒熱病。

貧窮下劣，困乏常無。無田亦憂欲有田、無宅亦憂欲有宅，無牛馬六畜、奴婢、錢財、衣食、什物，亦憂欲有之。適有一，復少一。有是，少是，思有齊等。適欲具有，便復糜散。如是憂苦，當復求索，不能時得，思想無益，身心

俱勞，坐起不安，憂念相隨，勤苦若此，亦結眾寒熱與痛共俱。

明貧人造苦，消失亦易。

或時坐之終身天命，不肯為善、行道、進德，壽終身死，當獨遠去。有所趣向，善惡之道，莫能知者。

既生死絕，趣向苦樂。

而在者不知不肯作善，故云莫知也。

世間人民，父子、兄弟、夫婦、家室、中外親屬，當相敬愛，無相憎嫉。有無相通，無得貪惜。言色常和，莫相違戾。或時心諍，有所恚怒，今世恨意，微相憎嫉，後世轉劇，至成大怨。所以者何？世間之事更相患害，雖不即時，應急相破，然含毒畜怒，結憤精神，自然剋識，不得相離，皆當對生，更相報復。

明瞋心造惡也。

人在世間愛欲之中，獨生、獨死，獨去、獨來，當行至趣苦樂之地，身自當之，無有代者。

明苦果。

善惡變化、殃福異處。宿豫嚴待，當獨趣入。遠到他所，莫能見者，善惡自然，追行所生。

善惡變化者，惡因得苦，善因得樂，其報易前也。

宿豫嚴待，作善者，天堂果報以待之；作惡者，刀山劍樹以待之。

窈窈冥冥，別離久長，道路不同，會見無期，甚難甚難復得相值。

何不棄眾事，各曼強健時，努力勤修善，精進願度世，可得極長生！如何不求道，安所須待，欲何樂乎！

明愚癡心造惡。

如是世人，不信作善得善、為道得道，不信人死更生、惠施得福。善惡之事都不信之，謂之不然，終無有是。

但坐此故，且自見之，更相瞻視，先後同然。

但坐此故，坐之意由。由其不信，造惡不悔。且自見之者，臨終相現，爾時方知也。

轉相承受父餘教令，先人祖父素不為善、不識道德，身愚神闇，心塞意閉。

身造惡故，云身愚。心不信故，云神闇。

死生之趣、善惡之道，自不能見，無有語者。吉凶禍福，競各作之，無一怪也。

生死禍福，無一怪也者，死亡祠祀，殺生為凶，嫁娶等為吉。世人於此二事競各為之。意是所宜，故云不相怪也。

生死常道，轉相嗣立。或父哭子、或子哭父。兄弟夫婦，更相哭泣。顛倒上下，無常根本，皆當過去，不可常保。教語開導，信之者少，是以生死流轉，無有休止。

如此之人，蒙冥抵突，不信經法，心無遠慮，各欲快意。癡惑於愛欲，不達於道德；迷沒於瞋怒，貪狼於財色。坐之不得道，當更惡趣苦，生死無窮已，哀哉甚可傷。

或時室家父子、兄弟夫婦，一死一生，更相哀愍。恩愛思慕、憂念結縛，心意痛著，迭相顧戀，窮日卒歲，無有解已。教語道德，心不開明。思想恩好，不離情欲。昏蒙閉塞，愚惑所覆。不能深思熟計、心自端正、專精行道、決斷世事，便旋至竟，年壽終盡，不能得道，無可奈何！

遍明受佛戒毀破者，故為誠。

總猥憤擾，皆貪愛欲。惑道者眾、悟之者寡，世間匆匆，無可聊賴。

云總猥憤擾者，正道心相煩多。

尊卑、上下、貧富、貴賤，勤苦匆務。各懷殺毒，惡氣窈冥，為妄興事。違逆天地，不從人心，自然非惡，先隨與之，恣聽所為。

惡逆天地者，上不順天心，下違閻羅王之意。

待其罪極，其壽未盡，便頓奪之。下入惡道，累世懃苦，展轉其中，數千億劫，無有出期。

待其罪極，便頓奪之者，正明滅壽奪算。

惡鬼打之，下入惡道，明受苦無窮也。

痛不可言，甚可哀愍。

明三毒十惡等造苦可厭。

E02 勸物修出離善

中有四：①舉善勸之，②領解，③勸生齊信心，④擊起時情執 彌勒同修。

F01 舉善勸之

佛告彌勒菩薩、諸天人等：我今語汝世間之事，人用是故，坐不得道。

當熟思計，遠離眾惡。擇其善者，勤而行之。愛欲榮華，不可常保，皆當別離，無可樂者。

遇佛在世，當勤精進，其有至願生安樂國者，可得智慧明達、功德殊勝。

及佛在世，有諮請之也，故須勤修。

勿得隨心所欲，虧負經戒，在人後也。

勿在人後者，明造惡墮三趣苦之失。

倘有疑意不解經者，可具問佛，當為說之。

倘有疑意，倘之意設。設有疑心，不解，可問佛也。

F02 領解

彌勒菩薩長跪白言：佛威神尊重，所說快善。聽佛經語，貫心思之，世人實爾，如佛所言。

今佛慈愍，顯示大道，耳目開明，長得度脫，聞佛所說，莫不歡喜。諸天人民、蠕動之類，皆蒙慈恩，解脫憂苦。

佛語教誡，甚深甚善，智慧明見八方上下、去來今事，莫不究暢。

舉益彰佛德，明由佛前世修菩薩道時，廣同法界。

今我眾等，所以蒙得度脫，皆佛前世求道之時謙苦所致。

今得成佛，慈悲出世，化度我等也。

恩德普覆，福祿巍巍，光明徹照，達空無極；開入泥洹，教授典攬，威制消化，感動十方無窮無極。

恩德普覆，成出世之益。福祿巍巍，彰佛威德高遠也。

佛為法王，尊超眾聖，普為一切天人之師，隨心所願，皆令得道。

今得值佛，復聞無量壽聲，靡不歡喜，心得開明。

F03 勸生齊信心

佛告彌勒：汝言是也。若有慈敬於佛者，實為大善。天下久久，乃復有佛。

今我於此世作佛，演說經法，宣布道教，斷諸疑網；拔愛欲之本，杜眾惡之源。遊步三界，無所罣礙。

典攬智慧眾道之要，執持綱維。

典攬智慧，執持綱維，明如來化物得益，發生真語。

昭然分明，開示五趣，度未度者。

昭然分明，得理在懷，開示五趣，明慈悲被下。

決正生死，泥洹之道。

決正生死，明其離苦。泥洹之道，明其獲出世之益也。

F04 擊起時情執 彌勒同修

有二：①勸自願勤修，②明順教舉旨。

G01 勸自願勤修

彌勒！當知汝從無數劫來，修菩薩行，欲度眾生，其已久遠，從汝得道，至

于泥洹，不可稱數。

汝及十方諸天人民一切四眾，永劫已來，展轉五道，憂畏勤苦，不可具言。
乃至今世，生死不絕，與佛相值，聽受經法，又復得聞無量壽佛。

快哉！甚善！吾助爾喜。

汝今亦可自厭生死、老病痛苦、惡露不淨、無可樂者，宜自決斷。

端身正行，益作諸善；修己潔體，洗除心垢；言行忠信，表裏相應；人能自度，轉相拯濟；精明求願，積累善本。

雖一世勤苦，須臾之間，後生無量壽佛國，快樂無極，長與道德合明，永拔生死根本，無復貪恚愚癡、苦惱之患。欲壽一劫百劫、千億萬劫，自在隨意，皆可得之，無為自然，次於泥洹之道。

汝等宜各精進，求心所願。

此中先誠斷惑。

無得疑惑中悔，自為過咎，生彼邊地七寶宮殿，五百歲中受諸厄也。

重誠勅勸斷疑惑也。明懷疑生邊地離佛前，遠至五百歲花不開，且不得自在至十方供養諸佛。

G02 明順教舉旨

彌勒白佛：受佛重誨，專精修學，如教奉行，不敢有疑。

E03 明善惡相形

有二：①將欲明惡，②正明五惡。

F01 將欲明惡

為善，歎為希有第一。

佛告彌勒：汝等能於此世，端心正意。

明其持戒。

不作眾惡，甚為至德，十方世界，最無倫匹。

成其希有之歎也。

所以者何？諸佛國土，天人之類，自然作善，不大為惡，易可開化。

明他土中，多有勝緣。又復善報強勝，作善為易。

此土無此二緣，修善即難，故名希有也。

F02 正明五惡

今我於此世間作佛，處於五惡、五痛、五燒之中，為最劇苦。教化群生令捨五惡、令去五痛、令離五燒。降化其意，令持五善，獲其福德，度世長壽泥洹之道。

五惡者，①殺，②盜，③邪淫，④妄語，⑤飲酒。損五戒善，故名惡也。
五痛五燒，明其苦果。由惡故燒，由燒故痛。何故但明此五。由世人喜造，故偏彰也。

為最劇苦者，此明說五戒對治。
降化其意者，悌心入道。令持五善者，順教修行。獲其福德者，舉遠近二果成其行也。

G01 總明

佛言：何等為五惡？何等五痛？何等五燒？
何等消化五惡？令持五善，獲其福德，度世長壽泥洹之道。

G02 別明

有三：①先明惡因，②明三報苦果，③總舉三毒之過。

H01 先明惡因

佛言：其一惡者，諸天人民蠕動之類，
明作惡之類。
欲為眾惡，莫不皆然。強者伏弱，轉相剋賊，殘害殺戮，迭相吞噬。不知修善，惡逆無道，後受殃罰，自然趣向。
明其所造惡。噬之意，噉也。又尋強剛，舉其惡果，成上惡因。
神明記識，犯者不赦。
神明記識者，名藉先定，不蹉跌也。
一切眾生皆有二神：一名同生，二名同名。同生女在右肩上書其作惡，同名男在左肩上書其作善。
四天善神一月六反錄其名藉奏上大王。地獄亦然。一月六齊，一歲三覆，一載八校，使不差錯。故有犯者，不赦也。
故有貧窮、下賤、乞丐、孤獨、聾盲、瘡啞、愚癡、慳惡，至有尪狂不逮之屬。

貧窮下賤，明人中餘報。
又有尊貴、豪富、高才、明達，皆由宿世慈孝修善，積德所致。
又有尊貴，舉得彰失。

H02 明三報苦果

世有常道，王法、牢獄，不肯畏慎；為惡入罪，受其殃罰；求望解脫，難得免出。
明三報至。

世間有此目前現事，壽終後世，尤深尤劇，入其幽冥，轉生受身。

舉其現報，壽終之至。尤劇，彰其生報。轉生受身，此明後報。

譬如王法，痛苦極刑。故有自然三塗無量苦惱，轉貿其身、改形易道，所受壽命，或長或短，魂神精識，自然趣之。當獨值向，相從共生，更相報復，無有止已。殃惡未盡，不得相離，展轉其中，無有出期，難得解脫，痛不可言。天地之間自然有是，雖不即時卒暴應至，善惡之道，會當歸之。

譬如王法者，引喻況。報輕在前，重苦在後。如似王法治罪，先杻械，詣市殺之。先現報，後入地獄，故云極刑。三塗無量苦惱者，出後報之重。

是為一大惡、一痛、一燒，勤苦如是。譬如大火，焚燒人身。

人能於中，一心制意、端身正行，獨作諸善、不為眾惡者，身獨度脫，獲其福德，度世上天泥洹之道，是為一大善也。

譬如大火者，勸修持戒，善以滅惡之。

佛言：其二惡者，世間人民，父子、兄弟、室家、夫婦，都無義理。不順法度，奢姪嬌縱，各欲快意，任心自恣，更相欺惑。

世間人民者，明作惡人。都無義理，明所作惡，明貪狼之人無謙讓。

心口各異、言念無實、佞諂不忠、巧言諛媚、嫉賢謗善，陷入冤枉。

心口各異者，口便規度，意念無實者，當面說善，情欲規度。

主上不明，任用臣下。臣下自在，機偽多端。

宰相之宦，縱放臣下用取萬民，賄枉取人物。

踐度能行，知其形勢。

因公憎私。

在位不正，為其所欺，妄損忠良。

惟過者主，由內不明，致有侵損。

不當天心，臣欺其君、子欺其父，兄弟夫婦、中外知識，更相欺誑。各懷貪欲、瞋恚、愚癡，欲自厚己、欲貪多有。尊卑上下，心俱同然。

破家亡身，不顧前後，親屬內外，坐之滅族。

或時室家、知識、鄉黨、市里、愚民、野人，轉共從事，更相剝害，忿成怨結。富有慳惜，不肯施與，愛寶貪重，心勞身苦，如是至竟，無所恃怙，獨來獨去。

明造惡不順善之心。

無一隨者，善惡禍福，追命所生。或在樂處，或入苦毒，然後乃悔，當復何及？世間人民，心愚、少智，見善憎謗，不思慕及。但欲為惡，妄作非法，常

懷盜心，悵望他利，消散磨盡，而復求索。邪心不正，懼人有色，不豫思計，事至乃悔。

神識孤遊戲，財留在自界。

今世現有王法牢獄，隨罪趣向，受其殃罰。因其前世不信道德、不修善本，今復為惡，天神剋識，別其名籍，壽終神逝，下入惡道。

彰三報苦。

故有自然三塗無量苦惱。

明生報苦。

展轉其中，世世累劫，無有出期，難得解脫，痛不可言。

明其後報。

是為二大惡、二痛、二燒，勤苦如是。譬如大火，焚燒人身。

人能於中，一心制意、端身正行，獨作諸善，不為眾惡者，身獨度脫，獲其福德，度世上天泥洹之道，是為二大善也。

舉善對之也。

佛言：其三惡者，世間人民，相因寄生，共居天地之間，處年壽命，無能幾何。上有賢明長者，尊貴豪富；下有貧窮廝賤，尫劣愚夫；中有不善之人，常懷邪惡。

世間人民，明作惡人。

相因寄生者，由過去，或作善知識，香火因緣相託，以為眷屬也。

但念姪逸，煩滿胸中，愛欲交亂，坐起不安，貪意守惜，但欲唐得。眄睠細色，邪態外逸，自妻厭憎，私妄出入，費損家財，事為非法，交結聚會興師相伐，攻劫殺戮，強奪不道。惡心在外，不自修業，盜竊趣得，欲繫成事，恐勢迫脅，歸給妻子，恣心快意，極身作樂。或於親屬，不避尊卑，家室中外患而苦之。

明造惡相也。

亦復不畏王法禁令。如是之惡，著於人鬼，日月照見、神明記識。

明現報。

故有自然三塗、無量苦惱。展轉其中，世世累劫，無有出期，難得解脫，痛不可言。

是為三大惡、三痛、三燒，勤苦如是。譬如大火，焚燒人身。

明後報生報也。

人能於中，一心制意、端身正行，獨作諸善、不為眾惡者，身獨度脫，獲其

福德，度世上天泥洹之道，是為三大善也。

舉生善滅惡也。

佛言：其四惡者，世間人民不念修善。轉相教令，共為眾惡。

明作惡之人。

兩舌、惡口、妄言、綺語。

明所作惡。

讒賊、鬥亂，憎嫉善人。

明兩舌。

敗壞賢明。

明妄語。

於傍快喜。

明綺語。

不孝二親、輕慢師長。

明作惡人造逆。

朋友無信，難得誠實。

成上妄語。

尊貴自大，

成其惡口。

謂己有道，橫行威勢，侵易於人，不能自知，為惡無恥，自以強健，欲人敬難。

成其兩舌。

不畏天地、神明日月，不肯作善，難可降化。自用偃蹇，謂可常爾，無所憂懼，常懷憍慢。如是眾惡，天神記識。

廣明自偃蹇難化也。

賴其前世，頗作福德，小善扶接，營護助之。今世為惡，福德盡滅，諸善神鬼各去離之，身獨空立，無所復依。

賴之意，蒙。頗之意，少。蒙前身少作善故，今世善神護之助彼。

作惡不息，善神捨去。

壽命終盡，諸惡所歸，自然迫促，共趣奪之。

又其名籍，記在神明，殃咎牽引，當往趣向，罪報自然，無從捨離。但得前行，入於火鑊，身心摧碎、精神痛苦。當斯之時，悔復何及！

明其三報。先明現報，明其惡相。來現依其往因，趣向受果，果自然。先因

後果，現無蹉跌。

天道自然，不得蹉跌，故有自然三塗無量苦惱。

明故有自然三塗也。

展轉其中，世世累劫，無有出期，難得解脫，痛不可言。

是為四大惡、四痛、四燒，勤苦如是。譬如大火，焚燒人身。

明生報後報也。

人能於中，一心制意、端身正行，獨作諸善、不為眾惡，身獨度脫，獲其福德，度世上天泥洹之道，是為四大善也。

明生善滅惡也。

佛言：其五惡者，世間人民，徙倚懈惰，不肯作善、治身修業。

家室眷屬，飢寒困苦。

父母教誨，瞋目怒應，言令不和，違戾反逆，譬如怨家，不如無子。

取與無節，眾共患厭，負恩違義，無有報償之心。

貧窮困乏，不能復得，辜較縱奪，放恣遊散，串數唐得，用自賑給。

耽酒嗜美、飲食無度，肆心蕩逸、魯扈抵突，不識人情，強欲抑制。

見人有善，憎嫉惡之。無義無禮，無所顧錄。自用職當，不可諫曉，六親眷屬，所資有無，不能憂念。

不惟父母之恩、不存師友之義，心常念惡、口常言惡、身常行惡，曾無一善。

不信先聖諸佛經法、不信行道可得度世、不信死後神明更生、不信作善得善為惡得惡。

欲殺真人，鬥亂眾僧，欲害父母、兄弟、眷屬，六親憎惡，願令其死。

如是世人，心意俱然。愚癡矇昧，而自以智慧，不知生所從來、死所趣向。不仁不順，惡逆天地。而於其中，悌望僥倖，欲求長生，會當歸死。

慈心教誨，令其念善，開示生死善惡之趣自然有是，而不信之；苦心與語，無益其人，心中閉塞，意不開解。

大命將終，悔懼交至，不豫修善，臨窮方悔，悔之於後，將何及乎！

明作惡之人，不肯為善，所作惡業。

天地之間，五道分明。

彰其三報苦。

恢廓窈冥，浩浩茫茫。善惡報應，禍福相承，身自當之，無誰代者。數之自然，應其所行，殃咎追命，無得縱捨。

善人行善，從樂入樂，從明入明；惡人行惡，從苦入苦，從冥入冥。誰能知者，獨佛知耳。

教語開示，信用者少，生死不休，惡道不絕。如是世人，難可具盡。故有自然三塗，無量苦惱。

展轉其中，世世累劫，無有出期，難得解脫，痛不可言。
是為五大惡、五痛、五燒，勤苦如是。譬如大火，焚燒人身。

恢廓者，明其寬曠。窈冥，明其深遠。浩浩茫茫，成上寬曠。

人能於中，一心制意、端身正念，言行相副、所作至誠，所語如語、心口不轉，獨作諸善、不為眾惡者，身獨度脫，獲其福德，度世上天泥洹之道，是為五大善也。

舉生善滅惡也。

H03 總舉三毒之過

有二：①勅離過修善，②舉善勸修。

I01 勅離過修善

有二：①舉過勸斷，②順教獲利。

J01 舉過勸斷

佛告彌勒：吾語汝等，是世五惡勤苦，若此五痛、五燒。

牒上眾過，勸識其因。

展轉相生，但作眾惡，不修善本，皆悉自然入諸惡趣。

明三毒。不除惡，惡不絕，苦果不息。

或其今世，先被殃病，求死不得、求生不得，罪惡所招，示眾見之。

明現報。

身死隨行，入三惡道，苦毒無量，自相焦然。至其久後，共作怨結。

明其生報。

從小微起，遂成大惡。

明其本報。或貪財，或貪皮肉，故云從少微起。

皆由貪著財色、不能施慧，癡欲所迫、隨心思想，煩惱結縛，無有解已，厚己諍利，無所省錄。富貴榮華，當時快意，不能忍辱，不務修善，威勢無幾，隨以磨滅。

出三毒之過。貪著榮華，貪現在樂造惡。

身坐勞苦，久後大劇。天道施張，自然糾舉。綱紀羅網，上下相應，瑩瑩忪忪，當入其中。古今有是，痛哉可傷！

身坐勞苦，明其苦身。久後大劇，明其三報之苦。天地施張，明諸天記。閻羅，又識也。

J02 順教獲利

佛語彌勒：世間如是，佛皆哀之。以威神力，摧滅眾惡，悉令就善，棄捐所思，奉持經戒、受行道法，無所違失，終得度世泥洹之道。

明順教斷惡，終獲出離。

I02 舉善勸修

有二：①勸自行外化，②明重誠勅。

J01 勸自行外化

佛言：汝今諸天人民及後世人，得佛經語，當熟思之，能於其中端心正行，主上為善、率化其下，轉相敕令各自端守，尊聖敬善、仁慈博愛。

佛語教誨，無敢虧負，當求度世，拔斷生死眾惡之本，當離三塗無量憂怖苦痛之道。

汝等於是廣殖德本，布恩施惠、勿犯道禁、忍辱、精進、一心、智慧，轉相教化。

為德立善，正心正意，齋戒清淨一日一夜，勝在無量壽國為善百歲。所以者何？彼佛國土，無為自然，皆積眾善，無毛髮之惡。

於此修善十日十夜，勝於他方諸佛國中為善千歲。所以者何？他方佛國，為善者多、為惡者少，福德自然，無造惡之地。

唯此間多惡，無有自然。勤苦求欲，轉相欺殆，心勞形困，飲苦食毒，如是匆務，未嘗寧息。

吾哀汝等天人之類，苦心誨喻。教令修善，隨器開導，授與經法，莫不承用，在意所願，皆令得道。

佛所遊履，國邑丘聚，靡不蒙化。天下和順，日月清明，風雨以時，災厲不起，國豐民安，兵戈無用，崇德興仁，務修禮讓。

佛言：我哀愍汝等諸天人民，甚於父母念子。今吾於此世作佛，降化五惡、消除五痛、絕滅五燒，以善攻惡，拔生死之苦，令獲五德，昇無為之安。

吾去世後，經道漸滅，人民諂偽，復為眾惡。五燒、五痛，還如前法，久後轉劇，不可悉說。我但為汝略言之耳。

J02 明重誠勅

佛告彌勒：汝等各善思之，轉相教誡，如佛經法，無得犯也。

於是，彌勒菩薩合掌，白言：佛所說甚善。世人實爾，如來普慈哀愍，悉令

度脫，受佛重誨，不敢違失。

彌勒承教。

D03 西方之相勸物信

文中有二：①現西方土使人欣慕，②問往生多少。

E01 現西方土使人欣慕

上雖耳聞說美土，未如眼見。故此下現土，令各慕修也。

此中有五：①明如來告侍者令請，②侍者起整服致請，③明放光現土，④佛審為見，⑤明問除疑惑。

F01 明如來告侍者令請

佛告阿難：汝起，更整衣服，合掌恭敬，禮無量壽佛。

十方國土諸佛如來，常共稱揚讚歎彼佛，無著無礙。

F02 侍者起整服致請

於是，阿難起，整衣服，正身西向，恭敬合掌，五體投地，禮無量壽佛。

白言：世尊！願見彼佛安樂國土及諸菩薩聲聞大眾。說是語已。

F03 明放光現土

即時，無量壽佛放大光明，普照一切諸佛世界，金剛圍山、須彌山王、大小諸山，一切所有，皆同一色。譬如劫水彌滿世界，其中萬物沉沒不現，滉漾浩汗唯見大水；彼佛光明亦復如是，聲聞、菩薩一切光明皆悉隱蔽，唯見佛光，明耀顯赫。

爾時，阿難即見無量壽佛，威德巍巍如須彌山王，高出一切諸世界上，相好光明，靡不照耀。

此會四眾，一時悉見。彼見此土，亦復如是。

F04 佛審為見

爾時，佛告阿難及慈氏菩薩：汝見彼國，從地已上，至淨居天，其中所有微妙嚴淨自然之物，為悉見不？

阿難對曰：唯然，已見。

汝寧復聞無量壽佛大音宣布一切世界化眾生不？

阿難對曰：唯然，已聞。

彼國人民乘百千由旬七寶宮殿無所障礙，遍至十方供養諸佛，汝復見不？

對曰：已見。

彼國人民有胎生者，汝復見不？

對曰：已見。

其胎生者，所處宮殿，或百由旬，或五百由旬，各於其中受諸快樂，如忉利天，亦皆自然。

F05 明問除疑惑

有六：①問胎生化生，②答胎生，③答化生，④同勸生，⑤結其得失，⑥作譬顯勝劣。

G01 問胎生化生

爾時，慈氏菩薩白佛言：世尊！何因何緣，彼國人民胎生化生？

G02 答胎生

佛告慈氏：若有眾生，以疑惑心，修諸功德，願生彼國。不了佛智、不思議智、不可稱智、大乘廣智、無等無倫最上勝智，於此諸智，疑惑不信。然猶信罪福，修習善本，願生其國。此諸眾生，生彼宮殿，壽五百歲，常不見佛、不聞經法、不見菩薩聲聞聖眾。是故，於彼國土，謂之胎生。

若有眾生，以疑惑心者，出其感胎生之緣。修諸功德，出其往生之因，願生故往生，由疑受胎。疑惑佛智者，出疑體。

於佛五種智，懷疑不信，故見佛奢致，使受五百歲中花不即開，故名胎生。

不了佛智，謂如來智無有邊畔。

不可稱智，謂無有限局。

大乘廣智，謂無照境不取。

最上勝智，謂照同凡境。

G03 答化生

若有眾生，明信佛智乃至勝智，作諸功德，信心迴向。

明信無疑。

此諸眾生，於七寶花中，自然化生，加趺而坐。須臾之頃，身相光明，智慧功德，如諸菩薩具足成就。

明化生果。

G04 同勸生

復次，慈氏！他方佛國諸大菩薩發心欲見無量壽佛，恭敬供養，及諸菩薩、聲聞之眾。彼菩薩等，命終得生無量壽國，於七寶花中自然化生。

G05 結其得失

彌勒！當知彼化生者，智慧勝故。其胎生者，皆無智慧，於五百歲中，常不見佛、不聞經法、不見菩薩諸聲聞眾，無由供養於佛、不知菩薩法式、不得修習功德。當知此人，宿世之時，無有智慧，疑惑所致。

G06 作譬顯勝劣

佛告彌勒：譬如轉輪聖王，別有宮室，七寶莊飾，張設床帳，懸諸繒幡。若有諸小王子，得罪於王，輒內彼宮中，繫以金鎖，供給飲食、衣服、床蓐、花香、伎樂，如轉輪王，無所乏少。

轉輪王，喻無量壽佛。七寶宮室，喻其淨土。王子得罪，喻疑心之人過。金鎖，喻花不開。牀褥不異，喻於花中受快樂自在。

於意云何，此諸王子，寧樂彼處不？

對曰：不也。但種種方便，求諸大力，欲自勉出。

佛告彌勒：此諸眾生亦復如是。以疑惑佛智，生彼宮殿，無有刑罰，乃至一念惡事，但於五百歲中不見三寶，不得供養修諸善本，以此為苦。雖有餘樂，猶不樂彼處。

若此眾生，識其本罪，深自悔責，求離彼處，即得如意，往詣無量壽佛所，恭敬供養，亦得遍至無量無數諸如來所修諸功德。

深自悔責者，明不必一種。若能悔，即出。不悔，必滿五百歲。是故下結勸也。

彌勒！當知其有菩薩生疑惑者，為失大利。是故，應當明信諸佛無上智慧。結勸也。

E02 問往生多少

彌勒菩薩白佛言：世尊！於此世界有幾所不退菩薩生彼佛國？

意欲勸物同此流勝，必取往生。上示往生方法中，但導三輩，不廣彰大士。

佛告彌勒：於此世界，有六十七億不退菩薩往生彼國。一一菩薩已曾供養無數諸佛，次如彌勒者也。諸小行菩薩及修習少功德者不可稱計，皆當往生。

佛告彌勒：不但我剎諸菩薩等往生彼國，他方佛土，亦復如是。

其第一佛，名曰遠照，彼有百八十億菩薩皆當往生。

其第二佛，名曰寶藏，彼有九十億菩薩皆當往生。

其第三佛，名曰無量音，彼有二百二十億菩薩皆當往生。

其第四佛，名曰甘露味，彼有二百五十億菩薩皆當往生。

其第五佛，名曰龍勝，彼有十四億菩薩皆當往生。

其第六佛，名曰勝力，彼有萬四千菩薩皆當往生。

其第七佛，名曰師子，彼有五百億菩薩皆當往生。

其第八佛，名曰離垢光，彼有八十億菩薩皆當往生。

其第九佛，名曰德首，彼有六十億菩薩皆當往生。

其第十佛，名曰妙德山，彼有六十億菩薩皆當往生。

其第十一佛，名曰人王，彼有十億菩薩皆當往生。

其第十二佛，名曰無上華，彼有無數不可稱計諸菩薩眾，皆不退轉，智慧勇猛，已曾供養無量諸佛，於七日中即能攝取百千億劫大士所修堅固之法，斯等菩薩皆當往生。

其第十三佛，名曰無畏，彼有七百九十億大菩薩眾、諸小菩薩及比丘等不可稱計皆當往生。

佛語彌勒：不但此十四佛國中諸菩薩等當往生也，十方世界無量佛國其往生者亦復如是，甚多無數。

我但說十方諸佛名號及菩薩、比丘生彼國者，晝夜一劫尚未能竟。我今為汝略說之耳。

廣明十四佛土，皆有往生之人。不但三輩，但使有善，皆可往也。

A03 流通分

有四。

B01 歎經深遠 廣彰利益 勸其受持

佛語彌勒：其有得聞彼佛名號，歡喜踊躍，乃至一念，當知此人為得大利，則是具足無上功德。

乃至一念，即是具足無上功德者，明利深遠。

一念至信，修行發願，必生淨土，終得佛果，故云無上也。

是故，彌勒！設有大火，充滿三千大千世界，要當過此。聞是經法，歡喜信樂，受持讀誦，如說修行。

勸重法，不辭眾苦。

所以者何？多有菩薩欲聞此經而不能得。若有眾生聞此經者，於無上道，終不退轉。是故，應當專心信受持誦說行。

吾今為諸眾生說此經法，令見無量壽佛及其國土一切所有。所當為者，皆可求之。無得以我滅度之後，復生疑惑。

釋應不辭苦。

B02 廣彰此經難值

當來之世，經道滅盡，我以慈悲哀愍，特留此經止住百歲，其有眾生值斯經者，隨意所願，皆可得度。

B03 舉眾難 欲彰此法難聞 勸生敬仰 受持不忘

佛語彌勒：如來興世難值難見，諸佛經道難得難聞。

菩薩勝法諸波羅蜜，得聞亦難。

遇善知識、聞法能行，此亦為難。

若聞斯經，信樂受持，難中之難，無過此難。

是故，我法如是作、如是說、如是教。應當信順，如法修行。

如是作者，立其大志。如是說者，說其國土正報殊勝。

如是教者，教修行願。如法修行者，勸其流通，舉教不違。

B04 時坐悟道得利

8 爾時，世尊說此經法，無量眾生皆發無上正覺之心。萬二千那由他人得清淨法眼，二十二億諸天人民得阿那含果，八十萬比丘漏盡意解。

四十億菩薩得不退轉。以弘誓功德而自莊嚴，於將來世當成正覺。

明悟道眾多。

爾時，三千大千世界六種震動，大光普照十方國土，百千音樂自然而作，無量妙花芬芬而降。

明感瑞證益。

16 佛說經已。彌勒菩薩及十方來諸菩薩眾，長老阿難、諸大聲聞、一切大眾，聞佛所說，靡不歡喜。

明聞見歡喜奉行也。

無量壽經義疏

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



香港新界屯門藍地青山公路18號妙法寺 <https://www.mfbm.hk>
18 Castle Peak Road, Lam Tei, Tuen Mun, N.T., Hong Kong